

O LE TALA FA'ASOLOPITO O LE LOTU EFKS APAI MANONO 1830–1881

O le Tūsiga tu'uina atu i le
Kolisi Fa'afaife'au a Malua
Samoa

O se vāega o le iloiloga o le Fa'aailoga o le
Bachelor of Theology (BTh)

Tūsia:

Faulalo Kennar

Aukuso 2019

AOTELEGA O LE TŪSIGA

O le sini autu o lenei galuega, ia saili ma faamauina le Tala Fa’asolopito o le Ekalesia Faapotopotoga Kerisiano Samoa i Apai Manono mai lona amataga. O le a mafai ona fa’ailoa i lenei Tusiga galuega sa feagai ma Faia’oga mai Rarotonga, aemaise o le Misionare Papalagi mai Europa sa autova’a atu i Apai Manono, i le taunu’u mai o Ioane Viliamu ma lona auva’a i Samoa, mo le fa’atalaleleiina o ona tagata.

O lenei sa’ili’iliga ua fa’atulagaina i Vaega e Tolu. Vaega muamua, e aga’i i le Tāua o Manono ma nisi o ona Tamali’i, i le Tala Fa’asolopito o le atunu’u. Vaega Lua, e aga’i tonu i le ‘a’ano moni o le Tusiga, O le Tala Fa’asolopito o le EFKS Apai Manono 1830 – 1881. Vaega Tolu, o le Tu’ufa’atasiga o le Tusiga e aofia ai lona Aotelega, ma le Vaai i le Lumanai, mo le sologa lelei o le Lotu i Apai Manono. O le tasi lenei aulotu ua loa i le atunu’u, a o le ulua’i EFKS i Manono.

ALOFA’AGA E AUALOFA AI

O lenei galuega e ‘aualofa atu ai i le susuga i le faafeagaiga Rev Iona Paniani ma le faletua ia Tasileta ma le fanau, ma le mamalu o le ekalesia EFKS i Apai Manono.

O lenei fo’i Tusiga ou te fai meaalofa atu ai mo mātua o si ou to’alua, ua tofafā mai tia, Finauapai Maligi ma Puava (EFKS Apai Manono). Fa’afetai auā o la oulua fa’amanuia ua matou sapi ai nei.

FA'AFETAI FA'APITOA

E muamua ona fa'afetaia le agalelei o le Atua i le fesoasoani mai o lona Agaga, ua mafai ai ona tau lau o lenei galuega.

Ou te faafetai i le susuga i le Faiaoga (Rev. Dr Seumaninoa Pua'ina) sa ia fa'atonutonuina le fa'agasologa o lenei Pepa mai le amataga seia tau mai i le i'uga. O lau fesoasoani e ala i tomai ma agava'a na e faasoa, lea ua tino mai ai lenei fa'amoemoe i lona ta'otoga lelei.

Avea fo'i lenei avanoa e momoli atu ai le fa'amalo i matua fa'aleagaga i Malua nei, (Rev.Reupena Maulolo ma Fuarosa) ona o le fa'amalosi'au aemaise o talosaga. E lē galo tima'iga ma la oulua fa'alototele e lagolago i lenei Tusiga, i galuega a auaiga.

Ou te momoli le faafetai tele i matua faaleagaga, Rev. Iona Le'au Paniani ma le faletua ia Tasileta i Apai Manono Tai ma la tatou Ekalesia. Fa'amalo tatalo o lea ua iu manuia lenei Sailiiliga ona o le fesoasoani mai i le tele o fa'amaumauga sa manaomia ai la outou fesoasoani.

O lenei fo'i avanoa tāua e fa'afetaia ai le susuga i le Alii Pule, (Rev. Ma'afala Limā) susuga i le Faatonu (Thesis Coordinator) Rev. Dr Vaitusi Nofoa'iga ma Faia'oga o le Kolisi Fa'afaifeau i Malua ona o lo outou sao i lenei taumafaiga. O lo outou tamaoiga faasoa mai lea ua sologa manuia ai le Tusiga.

E lē fa'agaloina le tapua'iga a aiga, nu'u ma uo i lo latou lagolagosua. E lagona lava le vaivai ma le fa'atauva'a, peitai o la outou tatalo ua maua ai le malosi faafouina e faaauau le taumafai ma lenei faamoemoe.

E muli'ai le faafetai i si ou to'alua, Beauty ma la'u fanau, Berekar
Tafatolu, Tinai, Bettina ma Norbert Fautua i lo latou lagolagoina o lenei
taumafaiga. E taua lenei Pepa e fai ma pine fa'amau o lo tatou ola ai i lu'itau o
le olaga i Malua.

LISI O ATA

Ata 1: Fa'afanua o Samoa

Ata 2: Fa'afanua o Manono ma Apolima

Ata 3: Nofoaga o le ulua'i falesā na fausia e Teava.

Ata 4: O fanuamaliu o le Misionare ma Faife'au

Ata 5: Fanua o Feletoa

ANOTUSI O LE TUSIGA


AOTELEGA O LE TŪSIGA	i
ALOFA’AGA E AUALOFA AI	ii
FA’AFETAI FA’APITOA.....	iii
LISI O ATA.....	v
UPU TOMUA.....	1
VĀEGA MUAMUA: O LE TĀUA O MANONO I LE TALA	
FA’ASOLOPITO O SAMOA	4
Fa'atomuaga	4
1.1 O le Mafua'aga o le Motu o Manono.....	4
1.2 O le Valo'aga a Nafanua.....	6
1.3 Tamafaigā	7
1.4 O le taunu'u o Misionare.....	9
1.5 Matetau	15
1.6 O le taunu'u mai o Peter Turner	19
VĀEGA LUA: O LE TALA FA’ASOLOPITO O LE LOTU	
EFKS I APAI MANONO MAI LE AMATAGA (1830-1881)	24
Fa'atomuaga	24
2.1 Matetau.....	24
2.1.1O Matetau ma Ioane Viliamu	25
2.1.2Matetau ma Faiā'oga.....	27
2.1.3Fa’amavaega ma Matetau.....	28
2.2 Teava.....	29
2.3 Peter Turner.....	31
2.4 Misi Ite	32
2.5 O le maliu o Matetau	37
2.6 O le maliu o Misi Ite	37
2.7 O le fanua o Feletoa	39
VĀEGA 3: TU'UFA'ATASIGA O LE TŪSIGA.....	42
3.1 Aotelega	42
3.2 O se va'aiga i le lumana'i	45
Tusi na Fa’aaogāina.....	49

UPU TOMUA

Ua fa'aulutalaina lenei Sailiiliga, **O le Tala'aga o le Lotu EFKS i Apai Manono.** E lē taumate, peisea'i ua fa'afagogo tagiao le fa'afofoga i le Tala Fa'asolopito o le Talalelei, ma lona taunu'u mai i laufanua o Samoa. Ua manino fo'i ma malamalama fa'amaumauga tusitusia, sa fitāituga ai Tamā o le Ekalesia ma le au Tusitala, talu mai le tausaga e 1830, lea na tōai taunu'u ai le Sāvali o le Filemu i Sapapalii Savaii.



Ata 1: Fa'afanua o Samoa.¹



Ata 2: Fa'afanua o Manono ma Apolima.²

¹ Maua mai i le <http://media.maps.com/magellan/Images/samoarah.gif>, i le aso: 1 Aukuso, 2019.

² Maua mai i le <https://www.alamy.com/stock-photo-peip1910-map-of-manono-island-samoa-81826604.html>, i le aso: 1 Aukuso, 2019.

O le afio'aga o Apai Manono, o lo'o iai ona tala'aga i Fa'amaumauga a le au Matutua ma Misionare papalagi e pei o Ioane Viliamu, i le Tala Fa'asolopito o le Talalelei ma le o'o mai o le Lotu i Samoa. O le ala fo'i lea o le naunau ma taumafai e tuu fa'atasia nei fa'amaumauga, mo le Tala o le Lotu EFKS i Apai Manono, i le ulua'i limasefulu tausaga o lona amataga.

O le fa'amoemoe maualuga o lenei Sailiiliga, ia aoga lenei galuega, e avea fo'i ma sao auā tupulaga au i luma o le nuu ma le afio'aga aemaise le Ekalesia. O le a iloa ai so'otaga o le EFKS i Apai ma le taunu'u mai o le Talalelei. Ae le gata i lea, o le sao tāua o nisi o tāmali o Manono, ma le nu'u o Apai, i le Tala Fa'asolopito o le Talalelei i Samoa.

E iai fo'i le talitonuga, e iai le so'otaga o le igoa o lenei nu'u o Apai i le atunu'u o Tonga. E manatu o le vaega tonu lenei o le motu o Manono sa aumau ma nonofo ai tagata mai Tonga i tausaga ua mavae. Aua o le mau e faapea, o le igoa Apai o le igoa mai Tonga, lea e faaigoa ai le isi motu o Tonga, o Ha'apai. E talitonu la le Sailiiliga, o tagata Tonga lava na latou faaigoa le pitonuu lenei o Manono ia Ha'apai poo Apai e oo mai lava i le asō.

O le pine fa'amau o lenei talitonuga, o le Suafa Finauha'apai po'o Finauapai, o se tasi o tāmali taua, o lo'o fa'alupe o le 'Matua' i le afio'aga, o loo iai lava e oo mai i le asō.

O le Sa'ili'iliga lenei o le a iloa ai ulua'i faia'oga ma Misionare na tulau'ele'ele i Apai Manono, ma vaega o le lalolagi na aga'i mai ai, ma le mafua'aga na omai ai.

Atonu o le a telē se sao o lenei Sa'il'iiliga, mo fa'amaumauga tusitusia
a le EFKS i Apai, i lona fa'avacina i le ulua'i limasefulu tausaga talu mai le
1830.

VĀEGA MUAMUA: O LE TĀUA O LE TALA'AGA O MANONO I LE TALA FA'ASOLOPITO O SAMOA

Fa'atomuaga

O le vaega muamua lenei o le tūsiga o le a agai ai i le su'esu'eina o le mafua'aga o le igoa o Manono, a'o lona tulaga i atumotu o Samoa ma lona tāua i le Tala Faasolopito. O le a agai foi le su'esu'ega i nisi o tāmalii logologoā o Manono e iai Tamafaigā, Faueā, Tuilaepa Esekia Matetau, faatasi ai ma le valo'aga a le tamaitai o Nafanua. O le vaega foi lenei o le tūsiga o loo atagia mai ai le sootaga o Manono i le Tala Fa'asolopito o le Talalelei, e lē gata o le LMS (London Missionary Society) ae faapea fo'i le WMMS (Wesleyan Methodist Mission Society). A o nisi nei o fesili o le a fai ma fa'atupu manatu i le vaega muamua o lenei Tūsiga.

1. Na faapefea ona o'o mai le Talalelei i Samoa?
2. O le a le tāua o Faueā i le o'o mai o le Talalelei i Samoa?
3. Aiseā na agai'i ai le vaalotu o Ioane Viliamu i Sapapalii, ae o Manono e muamua taunu'u iai va'a pe a fua i le alava'a?
4. O le a le sao o Manono i le Tala Fa'asolopito o Samoa?

1.1 O le mafua'aga o le Motu o Manono

O le Tala: O le ulugāli'i o Tea ma Lopa sa nonofo i Fiti e to'alua le la fanau. O le tama matua e igoa ia Manono, a o le tama laititi e leai se igoa. E fa'apea le tala, o tama nei e masani ona tau'aimisa. O se tasi aso na fai ai fusu'aga a tama nei ma fai a la tuliga agai i le sami, ma na maitauina le to'atama'i tele o le tama laititi. Sa maitauina e le ulugali'i le faifai tetele o

tuligāsi'a a le 'auuso nei, ona la taufetuli atu lea ma mulimuli atu iai. Fai mai, e lua ituaiga o I'a o le sami na 'uu atu e Tea ma Lopa a'o la tuliloa atu le la fanau i le sami loloto. E fetau i lo la taunu'u atu i le mea o iai le la fanau, ae tu a'e loa i luga le tama laititi ma le tao o le a fasioti ai le tama matua, le alii lea o Manono. Na vave ona apo (apo-le-lima) ma pu'e e le toeaina o Tea le lima o le tama laititi ma fa'asaoina ai le ola o Manono.

Na matuā to'atama'i le uso la'ititi ona ua lē tau lau o lona fa'amoemoe. Na tagi lea o le tama i lona ita tele, ua oso i luga ma fa'apalasi i le sami, ona tupu mai ai lea o le motu ma faaigoa ai o apo-le-lima (Apolima). Fai mai le tala o loimata o le tama la'ititi lenei, ua mafua ai le vai o loo iai i totonu o le motu o Apolima e oo mai i le taimi nei.

Fai mai na fa'anoanoa Tea ona o si ona atali'i ma le mea ua tūlai mai. Ona fai lea o Tea i lona atali'i matua o Manono, e alu e nofo i le itū i saute i sisifo o Apolima, ma o le mafuaaga lena o le iai o le motu o Manono i lea foi ogasami. O le toalua o Tea, le fafine o Lopa, ua fa'atonuina e alu e nofo i le va o Apolima ma Manono, faatasi ai ma ituaiga o I'a nei e lua (anae ma malau) e tua iai si a la fanau mo a la meaai. O le mafua'aga foi lea o le motu o Nuulopa o loo iai i le taimi nei i le va o Apolima ma Manono. A o le ala foi lea o le tele ai o nei ituaiga I'a i le motu o Nuulopa e tusa ma le molimau a tagata o Manono.³

A o Tea, ua liua ma i'a ua igoa o le Malatea⁴ i aso nei, o le a ia vaavaaia lona aiga. O le motu o Apolima o lo'o iai le ma'a e foliga o se tamai motu e feagai tonu ma le vaega e agai ai va'a i totonu o Apolima, auā e tasi le

³ Fa'atalatalanoaga ma le Susuga iā Finauapai Petelo, Aso 10 o Tesema 2018. Apai, Manono.

⁴ O le i'a e tupuga mai i le sugale.

itū o le motu e ulufale ai va'a mo le ofi atu i totonu. O le tala a se tasi tamāli'i o Manono, o lona ia talitonuga, o le papa po'o le ma'a lenei, o i tonu ua fai ma nofoaga o le toeaina o Tea. O le pine o lana faamatalaga, soo se taimi lava na te asia ai le papa lenei i ana fagotaga o le po, e mautinoa lava lona fanaina ai o le i'a lenei o le malatea. O le papa e fai ma nofoaga o le malatea i lea vaega o le moana sausau. O le tamāli'i⁵ foi lenei na ia ta'ua, o le I'a lenei o le malatea, a o'o ina tupu pea lona telē ma faasolo ina lapo'a tele, ona ta'ua loa lea o le Tagafa.

1.2 O le Valo'aga a Nafanua

O le taimi o le tula'i mai o le tamaitai tafa'ifā o Salamasina, e faapea se taofi, o aso ia o le mafuli tele atu o mafaufau o le atunuu i talitonuga i nisi malosi ese, e le vaaia ae matuā iloga mea e tutupu ai. E pei o le talitonuga i le mana o agaga po o aitu, latou te mafai ona fa'agaoioi manuia ma malaia o tagata. Sa talitonu tele le atunu'u i le matautia o le malosi tulagaese o agaga leaga atoa ma atua fa'apaupau sa talitonu iai.

Sa talitonuina foi le tamaitai foliga atua fafine, ma perofeta tamaitai iloga ma le ta'uta'ua o Nafanua. Ona o le tulagaese o lona tupu mai ma le ofoofogia o mea na ia faia, na avea lea ma ala o le matuā logosā'ia e tagata o lana upu, ma fa'autagia ana fautuaga ma ana tofiga i le taimi o lona tula'i mai. Ua manatu ai lava tagata i ia aso, o loo iā Nafanua se malosi lilo foliga atua.

O le ala lea o le gasolo iai o tāmali'i iloga o le atunuu, e saili mai ai ni o latou pāpā poo ni matūpalapala e tua iai lo latou lumanai saogalemū. E taunu'u atu le su'ega malō a Malietoa Fitisemanu ua ma'ape le fa'asoa. Ae na

⁵ Fa'atalatalanoaga ma le Susuga iā Finauapai Tavita, Aso 10 o Tesema 2018. Apai, Manono.

to lava lona inati ina ua saunoe le tamaitai, “Sau ia ina e alu ma i’u o malo, ae tāli i lagi se ao o lou malō.”⁶

1.3 Tamafaigā

O gātai o le afioaga o Salua Manono, e latalata i le a’au, o lo’o iai se tanuma’a tele i lalo o le sami e igoa o le “Paepae”. O le fa’amatalaga fai mai o le paepae lenei na faatonu e Tamafaigā Lei’ataua Pe’a ina ia tanu. O le taimi tonu o le sauā o Tamafaigā, ma o le talitonuga o le to’atele, o le Tafaiā mulimuli lava lea o Samoa a’o lei taunu’u mai le Lotu.

A o tu la le mālo o Tamafaigā, sa fefefe uma iai le atunuu. Sa ia fa’atonuina vaa feoa’i uma i le va o Upolu ma Savai’i e faapea o taimi uma lava latou te uia ai Manono, ia tofu le va’a ma le ma’a e lafo i le moana e tanu ai le paepae. Sa usita’ia e Samoa uma lenei poloa’iga. O aso uma lava e ui ane ai va’a taualo taitasi ma lafo nei maa i le moana mo le faamoemoe o Tamafaigā Lei’ataua Pe’a.⁷

Fai mai le tala so’o se va’a e lē usita’ia lenei poloa’iga, e fasiotia. O le mau a Manono, o le ‘a’ano moni o le poloa’iga a Tamafaigā ia fausia se nofoaga i lea ‘ogāsami, e fa’atonutonu atu ai ana osofa’iga. O le paepae lenei e fa’afesaga’i i uta, i luga o le tuasivi ma le “Aveavesefululua” lea sa faamautū iai ‘au a Tamafaigā. O le nofoaga lenei, o se tasi o mata’aga iloga o le motu atoa. E i luga o le tua’ia pe tusa o le 300 futu le mauuluga. A tulai se tasi i luga o lenei nofoaga, e ta’atia fua mai lava le motu o Nu’ulopa, Apolima ma le

⁶ Oka Fauolo, *Vavega O Le Alofa Laveai. O Le Tala Fa’asolopito O Le Ekalesia Fa’apopotoga Kerisiano Samoa* (Apia, Samoa: Malua Printing Press, 2005), 17.

⁷ Na’oia Fereti Tupua, *O Le Suaga a Le Va’atele (the Findings of the Big Canoe)* (Tamaligi, Apia Samoa: Malua Printing Press, 2002), 221.

motu tele o Savai'i. O le Aveavesefululua o lo'o fausia i luga o se mato e taufai tofē ona itū uma. O le fausaga o lona fa'avae, o le ma'a atoa pe tusa o le 60 futu lona fa'ata'amilosaga ae tasi lona auala savali e taunu'u ai i luga. O isi itu uma o le 'olo e faigata ona a'ea.

I le feagai i sisifo ma lenei 'olo, o loo tu mai ai le tia simā o Tamafaigā Lei'ataua Pe'a. O le mau a le afioaga e faapea, faatoa simā taluai nei lea tia, ao aso anamua sa na o se tia ma'a maua luga. Na pogai ona fausia i ma'a anamua ona o le alii lenei, na fai lana mavaega ina ia tanu faatu o ia pe a maliu ina ia mafai ai ona va'ava'ai atu i ona aiga uma i Savaii ma Upolu, sa fesoasoani ane i le fa'atūina o lona Mālō.⁸

I se taumafaiga e tau fa'amatala le aano moni o lenei 'olo o le Aveavesefululua, o le mau a le afioaga faimai, o le nofoaga lenei sa fa'atonutonu mai ai osofa'iga uma a Tamafaigā i vaega eseese o le atunuu⁹. Talu ai o Tamafaigā o le Tafa'ifa mulimuli lea o Samoa a'o lei taunu'u mai le Talalelei, sa o'o atu ana sauaga i le itumalo o atua i sasae ma tulimanu aupito i mamao o le motu tele o Savaii. O nu'u uma e o'o iai ana sauaga, e vaaia ai le lauē ma le toto masaa. Sa matata'u le atu Samoa atoa pe a va'aia ana fuāva'a ua tau lalata mai i fanua. O se toa e mataalia i le lau'ele'ele atoa ma le sami. O lana fuāvaa sa sili ona logologoā i ona taimi.

O le fa'amatalaina o le uiga moni o le "Aveavesefululua" e lē faigofie. Taluai ona o Tamafaigā o le Tafa'ifa mulimuli lea, e faapea se taofi, sa ia pulea uma itumalo mavae e sefulutasi o le atunu'u, e pei o Tumua, Pule, Ituaui ma le Alataua, Aiga i le Tai ma le Vaa o Fonoti. Ia silafia foi, o Tumua e

⁸ Ibid., 223.

⁹ Fa'atalatalanoaga ma le Susuga iā Tuilaepa Fuava, Aso 9 o Tesema 2018. Apai, Manono.

faasino ia Lufilufi ma Leulumoega, ao Pule i Salafai e faasino i Puleono. A tu'u iai ma Aiga ona maua ai lea o le numera e sefululua lea e faasino iai le "Aveavesefululua".¹⁰

O le tasi itū e mafai ona fa'amatalaina ai le uiga o le Aveavesefululua e faapea. Fai mai le tasi mau, e sefululua usuga aloa'ia a Tamafaigā. O lona sefululua e pei ona faamauina e le aiga o Fiamē ma Sagapolutele i Lotofaga ma Ulutogia o le usuga lea ia Tuatuamamao le alo o Sagapolutele Funeifeai o Ulutogia. Peitai o le taliu mai o Tamafaigā i ana tafaoga i le isi ana manamea, ae fasi ai loa e tagata o Fasito'outa ma maliu ai.¹¹

O lona suafa sa lauiloa ai i alii misionare o le "Tevolo," talu ai ana amio fa'apaupau ma le fa'atupu vevesi. O lona sauā sa fa'atuai ai ona tulau'ele'ele le Talalelei i lafanua o Samoa. E le'i leva ona fasia e Fasito'outa Tamafaigā ma maliu ai, ae tulaueleele loa Ioane Viliamu i Sapapalii i Savaii i le tausaga e 1830.¹²

1.4 O le taunu'u o Misionare

E talitonu uma tagata, o i ua taunu'u ai valo'aga a le tamaitai o Nafanua, e faapea, "tāli i lagi se ao o lou mālo." O le valo'aga o le o'o mai o le lotu i Samoa. Auā ina ua feiloai Malietoa ma le aumalaga i Sapapali'i, na ia iloa ai, o le mālo la lea na valoia e Nafanua.

Na mautinoa e Malietoa o le taunuu mai o le lotu i Samoa o le mea mai le Atua. O le ala foi lea o lona taliaina auā ua ia logotala i atunu'u tau lalata mai e pei o Tonga, ma Tahiti ma Rarotonaga, i suiga lelei ma le matagofie ona

¹⁰ "Fa'atalatalanoaga ma le Susuga iā Taupau Afioae", Aso 12 o Ianuari 2019. Salua, Manono.

¹¹ Tupua, 224.

¹² Ibid., 223.

o le Talalelei. Ua manatu ai Malietoa atonu o se auala lelei lea e taofia ai taua ma fevaevaea'iga i Samoa.¹³ Talu ai ai o lea e vevesi, i le faatoa mavae ai o le maliu o Tamafaigā i le fasiga i Fasitoota.¹⁴

O le aso 24 o Aokuso i le tausaga e 1830, o le aso e tumau pea lona tāua i loto ma mafaufau ao gasolo mai ma fai atu tupulaga o Samoa. O le aso na ulufale ai le malamalama o le faaolataga, ae mou malie atu le pogisa o le faapaupau, ina ua suluia Samoa i ave malolosi o le Talalelei ia Iesu Keriso. Na aumaia e le alii misionare Peretania o Ioane Viliamu (Rev. John Williams) ma lona uso a auauna o Salesa Papu, (Mr. Charles Barff) faatasi ma le au malaga i lo latou Vaa o le “Savali o le Filemu,” e fa’atautaia mai e le alii filifiligā ma le lototele o Ioane Viliamu. O le Malaga na amata mai Rarotonga, ae na ui mai i Tonga.¹⁵

Na feilo’ai le aumalaga a Ioane Viliamu ma le au Malaga a Natanielu Tana, o le Metotisi (Wesleyan Methodist Mission). Na faia la latou fonofono i Tonga, ma malilie faatasi ai o le LMS e aga’i mai i Samoa, ae aga’i le Metotisi (Wesleyan Methodist Mission) i Tonga ma Fiti.

O le aumalaga la lenei a Ioane Viliamu ma Papu o lo’o omai ai ma faia’oga mai Tahiti. O i latou mai Raiatea, Tuatoru ma lona to’alua, Umia ma lona to’alua ma Arua. O latou mai Huahine, Moia ma le to’alua ma le fanau e to’alima, ma Boti. E to’alua mai Moorea, o Fuatai ma Faaruea.¹⁶

¹³ Rev. John. Williams, *A Narrative of Missionary Enterprises in the South Sea Islands* (London: John Snow, 1840), 88.

¹⁴ Fauolo, 22.

¹⁵ Ibid., 15.

¹⁶ Richard Moyle, *The Samoan Journals of John Williams, 1830 - 1832* (Canberra Australian University Press, 1984), 23.

E tulaga ese ma manuia le o’o mai o le Talalelei i Samoa. Talu ai ua logotala Malietoa i atunuu tuaoi e uiga i le Talalelei. Fai mai le tala, na omai misionare ma se ulugalii Samoa mai Tonga o Faueā ma lona to’alua, le fafine o Puaseisei. O Faueā sa i Tonga pe a ma le sefulutasi tausaga.¹⁷ Na iloa e Faueā le tala i le va’alotu o Ioane Viliamu o le a agai mai i Samoa. Ona talosaga lea o Faueā ia Ioane Viliamu mo so la avanoa ma lona to’alua e omai ai i Samoa. Na saili fesoasoani Ioane Viliamu i le tupu o Tupou mo se fa’amatalaga o Faueā. Na faamaonia e Tupou o se tagata faamaoni tele Faueā. O lea na talia ai loa e le Misionare le ali’i lenei o Fauea ma lona to’alua latou te malaga faatasi mai i le va’alotu. Ua manatu Ioane Viliamu, o se laasaga tāua ma le aogā mo le faigamalaga. O le a mafai ai ona tau ta’ita’i le malaga mai i Samoa ma maua ai le fa’amatala upu mo alii misionare.¹⁸ O Faueā e lē gata o le tagata o le aiga o Malietoa, ae o ia foi o le Manono. E tau foi lona gafa ia Tamafaigā. O lona tamā o Seiuli o le aiga Sa Malietoā i Malie, a’o lona tinā o Tululautu, le afafine o Mulipola o Salua Manono.¹⁹ Sa aumau i Manono ma nofo ai i le aiga o lona tina, peitai o le sauā o Tamafaigā na sola ‘ese ai ma aga’i i Tonga i isi ona tau aiga ma nofo ai ‘ona o le fefe iā Tamafaigā.

Ua iloga le sao o lenei tamalii i le ‘aumaiga o le Talalelei. Na tu’ua e le va’alotu a Ioane Viliamu ma lona auva’a Tongatapu mo Samoa i le amataga o Me 1830. Sa lelei lava le folauga peitai o le tatafa mai o atumauga o Salafai, ae li’ai mai loa le afā malosi. Ona taumafai mai lea o lo latou va’a i le itu i sisifo ma faasolo ane ai i gatai o Falealupo ma aga’i mai ai i sasae. O gatai ane o Sasina na fetaiai ai latou ma va’aalo o tagata aloatu. Sa talanoa iai Faueā i

¹⁷ Ibid., 54-55.

¹⁸ Fauolo, 18.

¹⁹ “Fa’atalatalanoaga ma le Susuga iā Leiataua Pesa,” Aso 12 o Ianuari 2019. Salua, Manono.

lona fiaailoa po o a ni mea o tutupu mai i Samoa i lea taimi. O iinā na iloa ai e Ioane Viliamu, le faamaoni o le auai o le loto o Faueā i le galuega o lo’o fa’amoemoe iai. Auā na iloa lelei e Ioane Viliamu foliga popole o Faueā, i le taimi na ia fa’aalia ai le to’atugā e ono tulai mai i le galuega i Samoa, ona o le sauā o Tamafaigā.²⁰

Peitai, na matuā suia atoa foliga o le alii i le fiafia ma le olioli loloto, ina ua uma la latou talanoaga ma le au aloatu, ma iloa ai ua fasiotia Tamafaigā, pe tusa o ni masina taluai. Fai mai ua osooso pei e siva le alii i luga o le fogava’a ma alaga, “Ua mate le tevolo! Ua mate le tevolo! O le a lē afaina le latou feau”.²¹ E lei gata ia Faueā lea fiafia, a ua faapena uma lava le aumalaga, e pei ua fa’aopoopo se isi malosi fou ona o le auala ua fofola mai mo le galuega o aga’i atu iai.

Na fa’aauau le malaga i le Fa’asaleleaga ma o avanoa lelei ia na talanoa ai Faueā ma faufautua ia Ioane Viliamu i le faiga o le galuega ia faifai malie, ma taumafai e fa’aofi lēmū le finagalo o le Atua i loto o tagata. Ua talitonuina e ali’i misionare, o Faueā ma lona to’alua, o meaalofo na saunia e le Atua mo le Talalelei i Samoa. Ua iloa ai foi e alii misionare, o Faueā o se tagata e māgafagafa ma sogasogā ae loloto foi lana tofā.²²

O le itula e sefulu i le taeao o le aso 21 o Aokuso (1830) na taunu’u manuia ai le folauga i gataifale o Sapapali’i. E lei leva ona tu’utaula le va’a ae lolofi ane tagata i o latou paopao ma ua si’omia ai le va’a. E lei tatali le pupui upega na si’omia ai le va’a ia i latou na fea’ei a’e ma tulioso i luga o le va’a. Peitai sa tāua tele le iai o Faueā e faufautua i tagata mo le amio pulea.

²⁰ Fauolo, 21.

²¹ Moyle, 69.

²² Williams, 92.

A ua sili ona to'amalie mea uma ina ua afio atu Taimalelagi le uso laiti o Malietoa, ua latou feiloa'i i aga fa'atamali'i. Ua logo mai foi i alii misionare i le tōesea o Malietoa i le taua o faia i Upolu i le itumalo o Aana.²³ A ua avea lava Faueā ma Puaseisei ma fa'amatalaupū i la latou feiloa'iga. Ua la fa'amalamalama le uiga moni o le feau ma le sāvali, ua māfua ai ona malaga mai alii misionare, o a'oa'o ma o latou faletua.²⁴

Na vave ona logo Malietoa i Upolu ma agai atu i Sapapalii, a ua fa'aafe e Taimalelagi le malaga mo se fa'asiligā malosi ma sa va'aia le fiafia o le aumalaga i uiga talimalo lelei o Taimalelagi ma lona aiga.²⁵

O uiga tāmali'i ma le tusa'afia o le ali'i o Taimalelagi na maofa ai le aumalaga ina ua ia va'ai atu ia Faueā, o le tagata o lona aiga i Sapapali'i ma Manono, o lo'o sau ai i le malaga. A o lona uso matua o Malietoa o lo'o tau le taua ma fa'aumatia le ola o tagata e to'atele i Aana; ona o le fia tau i le toto o le tagata o lona aiga (Tamafaigā) lea na fasiotia i Fasito'outa. A tepa atu i le motu o Upolu, o lo'o tau lē iloa atu se vaega tele o le motu ona o le pupusa a'e o le asu mafiafia o le afi o loo susunuina ai fale, ma mea totino atoa ma tino maliliu o tagata ua fasiotia i le taua, o lo'o faia i Aana lea o lo'o tauina e Malietoa.

Na ma'ea le feiloa'iga a Malietoa ma misionare ma Faueā ina ua taunu'u atu i Savai'i, ma ua talia lelei le latou savali. Na tatalo foi Ioane Viliamu ia Malietoa ina ia taofia le taua o faia i Aana ina ia tusa ai ma le finagalo o le Atua. Na ta'utino Malietoa, a maea le taua i Aana, o le a lē toe iai

²³ Bro. F. Henry, *History of Samoa* (Apia, Samoa: Commercial Printers, 1979), 171.

²⁴ Williams, 85.

²⁵ Fauolo, 24.

ni taua i Samoa. Ona foai atu lea e misionare ia Malietoa le meaalofo: e lua
'ula (asoa) lanumoana, tasi le toi, tasi le tofi, tasi le naifi ma nai 'ie Tahiti.²⁶

Na sololelei le mafutaga a Malietoa ma misionare i le Agaga mafuta o
le Atua Silisiliese, ma saunoa ai Malietoa e faapea, "E amata i le asō, o le a
tanu i le eleele le Tafa'ifā o Samoa. O le a susū le Malietoa i Poutoa o le
tapa'au faasisina; ae afio Iesu i le lagi o le Tapa'au Faalelagi, o le Tupu lea o
Samoa"

Sa matuā faaalua manino foi ina ua tagata matua le soifua o Malietoa
Tavita, (Vainuupo) le leai o sana taumafaiga ina ia seei lona atali'i o Mōli i le
Tafa'ifā pe a mavae atu ia. A o lona finagalo ia alu Mōli e nofo i Malie ma
faasaga e lagolago le galuega a misionare ma a'oa'o o le Talalelei i le atunuu;
ma ia lē gata i Malie ma Afega ma le Tuamasaga, a ia oo lava i Aana i le mea
o loo tulai mai ai Tuimalealiifano Sualauvi, o le tama a Tu'itōfā le tuafafine o
lona tamā.²⁷

Sa leai ni igoa o aso o Samoa anamua; vagana taua ma taulaga sa fai e
iloa ai aso. Ua ifo ia aso a ua faitau aso fou faalelotu. Na fa'amamaluina e
misionare i Sapapali'i le aso o le Alii, le aso o tapuaiga faitele i le Atua, ua sã
nisi galuega ma ua fa'aigoa lea aso o le Aso Sã. Sosoo ane ai ma le aso ua
taga, ua gafua- Aso Gafua, ma le isi aso ua lua a'i aso o le vaiasosa, Aso Lua.
O lona tolu o le Aso Lulu, sa ta'u foi o le Aso Manu. Sa fai tofiga a A'oa'o mo
le Aso Sa i lona fa o aso, ona fa'aigoa ai lea o le Aso Tofi. Na tau faaa'oa'o

²⁶ Ibid., 25.

²⁷ Ibid., 31.

atu le igoa o lona lima o aso i le ta'u faa Peretania; Friday, Faraile; Aso Faraile, ma le aso e sauni ai to'onai mo le Aso Sa; Aso Toona'i.²⁸

1.5 Matetau

O le tau fa'aiuga o le masina o Oketopa 1830 ina ua mavae le po o le mafutaga tatalo, ma ua sauni le va'alotu e toe foi. Ua tima'i atu foi misionare i a'oa'o ma latou faletua ma fanau i upu faatupu malosi e tusa ma le galuega ua fa'ae'e atu i tau'au o a'oa'o e fa'atino ma fa'agasolo. Ua o'o i le taeao ua fa'atumulia le matāfaga o Sapapali'i o e ua fia fa'amavae atu ia Viliamu ma Papu a'o savavali atu i le va'a laititi e o ai i tai i le va'atele o loo tau mai ai. O totonu o lea fa'apotopotoga tele o lo'o lotolotoi mai ai nai a'oa'o ma o latou aiga ma loimata o loo tafe ifo i le va'ai atu i o latou ta'ita'i o le a fo'i ae tu'ua i latou i nu'u ese.

Peitai o le taimi lea o le fa'ae'ega, ua iloa ane ai e Ioane Viliamu o loo iai le alii tele o Manono o Matetau, na malaga mai i lona paopao e fia feiloai ma i latou. Ona vala'auina lea o ia e Viliamu ina ia alu atu i luga o le va'atele. Ua latou feiloa'i fiafia, ma ua fa'amatalaina e Viliamu lea ali'i o se tagata aupito tino ese lea ua ia vaai iai talu ona feiloa'i ma isi tagata atumotu. E lē gata ina tino 'ese ma maluali'i, a o le masoa ma tutu'a e foliga o se toa mata'utia.²⁹ Fai mai a ia, ai lava e fa'apea le toa Filisitia o Koliata, e pei ona ta'ua i le Tusi Paia. Ua latou malaga fa'atasi loa ma alualu pea le vaa seia oo ina tu'utaula i gatai o Manono. Ma na atoa lava le aso o mapu le malaga i lea gataifale. Ua fa'ailoa e Matetau lona mana'o na malaga mai ai ma le loto naunau o lona fia vave maua lava lea o se faiaoga na te a'oa'o ia te ia ma ona

²⁸ Kenape T. Faletese, *A History of the Samoan Church (Lms)* (Apia, Samoa: Malua Printing Press, 1959), 13.

²⁹ Williams, 92.

tagata le upu o le ola. Sa ia folafola ma ta'utino o le a ia matuā puipui saogalemū se faiaoga e tu'uina atu mo ia. Ma o le a ia tausī ma fafaga lelei ma usiusita'i i ana aoaoga, ma faatonu foi ona tagata uma ina ia faapea ona latou faia. Sa fautuaina e Viliamu ina ia lē soona fa'amalosia tagata, a ia maua pea le sa'olotoga e filifili ai le tagata ia pe a uma ona va'ai i fa'ata'ita'iga lelei.³⁰

Ua folafola loa iai e Viliamu o le a ia aumaia se faiaoga mo ia pe a toe foi mai lana malaga e aunoa ma se faaletonu. Talu ai o faiaoga na latou omai ua uma ona tofofi i nu'u o Savai'i ma ua i lalo uma o le va'aiga a Malietoa. Ua foaina atu foi ia Matetau le meaalofoa, o to'i tetele e lua, to'i laiti e lua, o naifi e fa, o seleulu e lua, ma le matatioata e tasi.

Ua talia e Matetau meaalofoa ma le fialia tele e le gata o meaalofoa, ao le folafolaga tāua, o le a maua mai se faiaoga mo ia pe a toe fo'i mai le ali'i misionare. Sa vave ona oso Matetau i lona va'a ma folau loa i uta. Peitai sa vaaia atu lava i tai, e le'i leva ona taunu'u le alii i uta, ae toe taliu mai. Sa faapea poo iai se mea o galo, ae leai o le fia aumaia o mea'ai e tele e fesoasoani i le fa'aoso o le Malaga.³¹

O Matetau sa igoa i le suafa Tuilaepa o Apai Manono, o lona aiga o lo'o iai lava lea suafa e o'o mai i le taimi nei. E iai lona afafine sa avea ma masiofo a le Tupu o Tonga, o Salote le suafa o le tamaitai. E faapea le tala, o le tamaitai lenei na toe foi mai i Manono ma aumai le tele o meaalofoa mo Matetau, ina ua liua le Tupu Tonga e avea ma Kerisiano, i lalo o le taitaiga a misionare Metotisi. (Wesleyan Methodist Mission Society).³²

³⁰ Fauolo, 33.

³¹ Ibid., 34.

³² John Garrett, *To Live among the Stars* (Suva, Fiji: WCC and USP, 1970), 79.

O **Teava** mai Avarua i Rarotonga o se a’oa’o na fofoa mai lona faakerisianoina ma lona a’oa’oina i le Tusi Paia e Rev A. Buzacott (Misi Pusakota). Sa faauuina foi i Avarua e fai ma failauga o le Talalelei. O le mea lea ua avea ai le filifilia o ia e Ioane Viliamu e fai ma tali i le mana’o o Matetau i Manono ma tofiga ua sili ona talafeagai. Na aumaia o ia e Ioane Viliamu i lana malaga lona lua i le 1832.

E faapea le tala na sui le alavaa na uia e le malaga lenei lona lua a Viliamu i le 1832, ma ua lē amata mai i Savaii a o lea ua ui mai i sasae. Na taunu’u muamua i Manu’a i le aso 17 Oketopa, 1832 ona afea lea o le motu o Ta’ū, ma iloa ai ua iai tagata kerisiano i Manu’a.³³ Na faasolo mai i Tutuila ma afea Leone ma iloa ai ua iai tagata kerisiano, ona o le galuega a ‘Amo’amo, e alu i Savai’i i faia’oga i Sapapali’i ona sau lea i Tutuila ma fai Lotu. Ua tatalo foi Leone ia Viliamu mo se latou faia’oga, e pei fo’i ona tatalo ane o Manu’a, ae na faamalie iai Viliamu e na o le tasi lava le a’oa’o misionare o loo fa’amoemoe mo le ali’i o Matetau i Manono.³⁴

Taunu’u i Manono ua alu ane le uo tino’ese o Matetau ua feāsogi ma le fīafīa... “A o fea sa’u faiaoga na e folafola mai?” ona fa’asino atu lea iai o Teava ma lona to’alua, ua fīafīa tele ai lava. Na lelea ‘ae le va’a o Matetau i uta ma tau ‘alaga – “O Viliamu! Ua aumai la tatou a’oa’o”.³⁵

³³ Moyle, 100.

³⁴ Williams, 105.

³⁵ Faletese, 15.

Na auina atu Teava ma lona faletua iā Matetau ma aumau ai i Apai
Manono ma amata ai loa le la galuega i le motu o Manono i le tausaga e
1832.³⁶

Mulimuli ane ina ua mavae ni nai masina, na tusia e Teava se Tusi ma
feso’ota’i ai iā Ioane Viliamu ma faaalua lona agaga fiafia i lo la aumau ai i
Apai Manono. I fa’amaumauga a Viliamu o lo’o iai le Tusi lenei a Teava;

Mo Viliamu,

Ou te fiafia tele i Apai Manono. O Matetau ma ona tagata
e ese le loto alolofa ia i ma’ua. Ua latou fo’ai mai taumafa
aemaise o le saogalemu ma le sologa lelei o le galuega. Ua
fausia fale ma te nonofo ai ma faletele mo a’oga, ma ua
matuā fa’atumulia lava i taimi o sauniga lotu.

O le taeao nei sa a’oa’oia ai le alafapeti a’o faatumulia i
le tele o tagata.

Ia manuia ona o Iesu.

TEAVA³⁷

O le to’atele o tusitala o lo’o latou tusia le tala o galuega lelei a Teava,
o lo’o laualuga ai lava le manatu, o Teava o le toa o le fa’asologa o le au
Rarotonga na matua logologoā lana galuega. O le galue fiafia ma le lē
fa’atua’oia o Teava sa iloa i lona folau solo i lona paopao ma asiasi i nisi nu’u
o Upolu. Sa o’o lava ana folauga i Tutuila e aunoa ma sona popole i uiga o le
tau. O ia lava le teuteu ala mo nisi o misionare papalagi na taunuu mai
mulimuli ane. (1836) Na saunia e Teava fale mautu mo misionare papalagi
ma o latou aiga o e na taunu’u mulimuli ane i Leone. E faapena foi fale mautu
na faia e Teava i Manono e taunu’u atu iai Misi Ite ma le faletua (Rev. & Mrs.
Thomas Heath) i le 1836.³⁸

³⁶ Api o le galuega: Apai. Manono Island; courtesy of Rev. Iona L. Paaniani.

³⁷ Williams, 118.

³⁸ Fauolo, 40.

E tolusefulu tausaga na galue ai Teava i Samoa ona toe fo'i ai lea o ia ma lona faletua i lo latou atunuu o Rarotonga, ma le suiga tele i ona foliga vaaia. Na sau le alii faifeau ma ona foliga talavou tino malosi, a ua fo'i atu nei o se tagata tinovale ua mafatia i le ma'i o le mumu tutupa, sa puapuagatia ai le to'atele o tagata Samoa i na aso. A o lona ola faalēagaga ma lona faatuatua, e lei pisia i se mea e tasi o vaivaiga o le olaga sa ta'atele i na aso.³⁹ O loo ta'ua e nisi, o Teava ma lana avā agalelei, o uo faamaoni loto fesoasoani. E sili ona tele mea lelei na la faia mo le ekalesia Samoa nai lo mea ua mafai ona maua i faamaumauga. O Teava atoa ma ana uo mai Tahiti ma Rarotonga, o nisi ia o maaola o le talatu'u o le EFKS i lona tupu mai.⁴⁰

1.6 O le taunu'u mai o Peter Turner

O le masina o Iuni 1835 na taunu'u ai i Manono le va'alotu a le Metotisi (WMMS), e ui ua uma ona feutaga'i Ioane Viliamu ma Natanielu Tana i Tonga i le 1830. O le mafutaga lea ua taofi Ioane Viliamu na maua ai le malilie e agai le Uesiliana i Fiti pe a fa'asopolia Tonga, ae aga'i mai le LMS i Samoa.⁴¹

Fai mai sa usu le fono a Le'iataua Putetele ma ana tulafale o Futi ma Sā Mutimuti i Faleū. O se aso filemu ma to'amālie, ae na fa'ateia le Fono ina ua pa mai le tala o lo'o iai se va'a e fou i le vaai o lo'o taula mai tai i le ava. Na vave ona asia le va'a ma maua mai ai le tala, o le malaga mai le lagi. Sa fa'atunuina e Le'iataua le fetalaiga ia Talo ina ia fa'aafe le malaga ma aumai i le fono.

³⁹ Rev. R. Buzacott, *Mission Life in the Islands of the Pacific* (Paternoster Row, London: John Snow and Co. Ltd., 1866), 120.

⁴⁰ Fauolo, 41.

⁴¹ Ibid., 64.

Na feiloai misionare ma Le'iataua ma le nuu o Faleū Manono ma fa'ailoa e Peter Turner le mafuaaga o le oo mai. Na talia lelei e Le'iataua le finagalo o misionare ma fo'ai ai e misionare meaalofa (a shilling) mo Le'iataua i lona talia lelei o latou. O le mafua'aga lea o le suafa Seleni mai lava i le taunuu mai o misionare Metotisi i Faleu Manono, ma o lo'o iai lava lea suafa i Manono.

O le taunu'u mai o le Lotu Metotisi i Manono o se tala 'ave i le Tala Fa'asolopito o le Lotu i Samoa, ma ua iai ona pine fa'amau. O le malumalu a le ekalesia Metotisi i Faleū Manono o lo'o fa'aigoaina o le "Lu'aipou o Mālō". Ua iai fo'i Taeao o le Talalelei i le afio'aga a Faleū, "Taeao na i Faleū ma Utuagiagi". O lo'o iai fo'i le Ma'a Fa'amanatu o Peter Turner i le afio'aga o Faleū, e fai ma pine o le taunu'u mai o le Ekalesia Metotisi i Samoa.

Na fa'aalia le lē fialia o Ioane Viliamu i le o'o mai o Peter Turner i Samoa. Na feso'otai i Lonetona ma maua mai ai le fa'aiuga ia tu'ua e Peter Turner Samoa.⁴² O le 1839 na tu'ua ai Samoa ma o le fa'aseā a Peter Turner e faapea, e leai se feutaga'iga na fai ma Ioane Viliamu, e aga'i le Uesiliana i atumotu o Fiti.⁴³

Na fa'aauau pea e Joel Tupou (le uso o King George Tupou Taufaahau I) le galuega tala'i a le Uesiliana ina ua tu'ua e Peter Turner Samoa i le 1839. Na asiasi mai i Samoa le ali'i lenei o Joel Tupou ma fesoasoani i faia'oga ia na aumai e Peter Turner ma tuu i Manono.

⁴² Malama Meleisea, *Lagaga: A Short History of Western Samoa* (Suva, Fiji: Institute of the Pacific Studies and Western Samoa Extension Centre of the USP, 1987), 62.

⁴³ Ibid.

Na maitauina le fenofu'ai o tagata Tonga ma Samoa i na aso ma avea ma mea sa fesoasoani ai i le atina'eina o le lotu Metotisi, ma maua ai tagata lotu e toatele. O le ala foi lea o le toatele o aiga Samoa ua iai o latou pi'itaga i Tonga aemaise lava le motu o Manono.

O le taunuu o Peter Turner i Manono i le 1835 na fesiligia lava e le to'atele pe aisea na filifili ai e tulau'ele'ele i Manono. Auā fai mai le tala, na omai le Metotisi i Samoa i le 1828 ae le'i tulau'ele'ele, e ui na ta'ita'i mai e Saiva'aia, o le Samoa (Satupaitea) sa i Tonga. O le ala lea na tu'u ai e Peter Turner faia'oga e to'alua ia Le'iataua i Faleū Manono, ae o ma ave isi faia'oga i Satupaitea, le afioaga o Saiva'aia.⁴⁴ Na tatalo Lilomaiava ia Malietoa mo sana faiaoga peitai na teena e Malietoa le talosaga ona e finagalo Malietoa ia i lalo uma o lana va'aiga misionare. O le ala lea o le saili o Lilomaiava i Tonga mo sana faia'oga.⁴⁵ O fe'ese'esea'iga la nei a Malietoa ma Lilomaiava na mafua ai ona afe le va'a o Peter Turner i Manono i le mea o iai le alii o Matetau.

1.7 Lotu Katoliko i Manono

O Father Gilbert Roudaire (Silipili) ma Father Louis Violette, (Lutovio) o i la'ua ia na muamua aumaia le Lotu Katoliko i Samoa mai le atunu'u o Uea (Wallis). Na omai fa'atasi ma Samoa e to'alua sa aumau i Uea, o Kosetatino ma Ioakimo. O le taunu'u muamua mai o le LMS ma le Metotisi i Samoa sa fa'afaigatā ai ona talia le Lotu Katoliko. O le ala lea o le teena e nisi o afio'aga e pei o Falealupo, Matautu ma Safune. Peitai na manuia

⁴⁴ Ibid., 61.

⁴⁵ Williams, 117.

mulimuli ane ina ua feiloa'i ma Tuala Taetafe o Lealatele i Savaii ma fai ai le ulua'i sauniga o le Misisā i le aso 15 o Setema 1845.⁴⁶

O le taliaina e Tuala Taetafe o le Lotu Katoliko na maua ai lona igoa fa'aopoopo o Tuala Talipope, ma ua avea ma igoa tāua o le afio'aga.

Na fa'asolo ane i Salelavalu ma agai mai ai i Upolu ma taunu'u atu ai i Faleata, peitai sa teena e Faumuinā, ona o ai lea i Mulinu'u ma maua ai lo latou to'omaga ia Mata'afa Fagamanu, o le tagata lotu a le LMS. Na tusi mai Lavelua, (le ali'i sili o Uea) iā Mata'afa Fagamanu e alofa ane i nai uso o le Lotu Katoliko lea ua i Samoa. E mafana le mafutaga a Lavelua ma Mata'afa Fagamanu auā, na agalelei Lavelua ia Mata'afa Fagamanu ma i latou na afātia i le vasa ma oo atu ai i Uea. Ona tu'uina atu lea e Fagamanu lona fanua i Mulinu'u latou te fa'aaogaina, ona o le la va lelei ma Lavelua o Uea.⁴⁷

Na o'o le Lotu Katoliko i Manono ona o Mata'afa Iosefo. O ia o se tagata lotu Pope ma e tau fo'i lona gafa i Manono. O ia o se ta'ita'i iloga o Samoa i nā vaitaimi sa ia matuā lagolagoina malosi le Lotu Pope. Sa aumau i Manono ma avea o se poutū o le Lotu Katoliko ma Samoa atoa. E taunu'u atu la le Lotu Pope i Manono i le tausaga e 1871, o malosi le lagolago a tagata i le LMS ma le Metotisi. A o le tausaga e 1877 sa fa'amautuina ai loa le nofoaga o le Katoliko i Manono, i Mālōtau (Manono uta) se'ia o'o mai lava i le taimi nei, talu ona taunu'u mai i Samoa i le 1845. E faapea le tala, o le o'o mai o le Katoliko i le Pasefika, ina ua saina faamalosi e le French Navy ma Queen Pomare IV o Tahiti le feagaiga e taliaina ai i Tahiti.⁴⁸

⁴⁶ Rev. Father. SM. Heslin, *A History of the Roman Catholic Church in Samoa, 1845 - 1995* (Apia, Samoa: Ed. M. B. Tyquin 1995), 24.

⁴⁷ Ibid., 25.

⁴⁸ Garrett, 254.

E tasi le Lotu Katoliko i Manono tai i le afioaga o Faleū. O afio'aga o Faleū ma Salua e iai le Metotisi, a o afio'aga uma e fa (Salua, Faleū Lepuia'i, Apai) e tofu ma le EFKS.

E tãua tele Manono ma ona tagata i le tala faasolopito o Samoa ma le Talalelei e ui o se motu laititi ma tau leai ni tagata pe a faatusatusa ia Upolu ma Savaii. E lē itiiti le galuega fitā sa tauasaina e tamāli'i o Manono auā o lea ua atoa uma iai lotu tetele e tolu. Pe le o se manuia ea lea mo Manono?

VAEGA LUA: O LE TALA FAASOLOPITO O LE LOTU EFKS I APAI MANONO MAI LE AMATAGA (1830-1881)

Fa'atomuaga

O le vaega lenei o le Tūsiga o le a aga'i ai le sa'ili'iliga ia i latou o lo'o faaautū iai le fa'avaeina o le lotu i Apai Manono. O i latou nei e aofia ai Matetau, o le faia'oga mai Rarotonga o Teava, ma le misionare papalagi mai Peretania o Thomas Heath, (Misi Ite) ma Marama mai Rarotonga fo'i. A o lei taunu'u Thomas Heath i le 1836, sa muamua mai le Uesiliana, o le misionare papalagi o Peter Turner ma ana faiaoga i Manono i le 1835. O le ala lea o le o'o iai o le sa'ili'iliga mo se malamalama'aga i feutaga'iga na fai, ma mea na tutupu ai.

E lē itiiti le sao o Teava, Thomas Heath ma Marama i le LMS i Samoa, o le ala foi lea o le fa'aילוaina o latou agava'a i so'o se vaega o le LMS sa auauna ma tautua ai mo le Talalelei. O a latou matat'ia ma le mao'ae o latou tautua o le a o'o iai se sa'ili'iliga i lenei vaega o le Tusiga, e lē gata o Manono, a o le atu Samoa ma le Pasefika.

2.1 Matetau

O le naunautaiga lava o Matetau ia maua se faia'oga o le Talalelei mo ia ma ona tagata. E lē taumate sa ia fa'atali ma le toto'a ia Ioane Viliamu e tusa o a lā tuugatala sa faia i luga o le vaa, le Sāvali o le Filemu.⁴⁹

Sa ia mafaufau loloto mo le galuega a le Atua pe a taunu'u se faia'oga. O lona manatu, e tatau ona iai se fasi fanua mo le faiaoga e aumau ai. O le

⁴⁹ Fauolo, 34.

tausaiaina ma le malupuipuia o le faiaoga e patino lava ia te ia ma ona tagata. E tatau foi ona iai se fanua mautu mo le malumalu tapuai a le afioaga.

O mataupu faapenei e tusa ai ma tū ma agaifanua a tamali'i Samoa i totonu o nu'u, e usuia le fono a ali'i ma faipule ona soālaupule lea. E talitonu le manatu sa faapea ona faia e Matetau i lona nu'u. E oo fo'i la i le aumaiga o le lotu i totonu o Apai Manono, sa silasila iai le ali'i i vaega uma nei e pei ona tā'ua i luga. A o mafaufauga fo'i ia ua masani lelei ai Viliamu i le soifuaga o tagata pe a o'o ina liliu i le Talalelei ma avea ma Kerisiano

2.1.1 O Matetau ma Ioane Viliamu

Ua maitauina i lenei Tusiga le sao tāua o le alii o Matetau, o Apai Manono. Ou te talitonu sa tapena e le Agaga o le Atua le loto o lenei tamalii mo le o'o mai o le Talalelei i Samoa. Auā o le tausaga na taunuu ai le vaalotu o Ioane Viliamu i Savaii, na tu laueleele ai foi Matetau i lona fia feiloai atu iai.⁵⁰

O le faamalieina o Matetau i le tali mai o Viliamu i lona mana'o na ia foa'i ai taumafa e tele mo le aumalaga.⁵¹ A'o tu ma aga ia ua iloa ai le alofa i tagata ese, ma le agaga talimalo o tua'a ua mavae ia i latou e asiasi mai i Samoa. Lea lava o loo atagia i aso nei i aiga, nuu ma le ekalesia.

Ua talia e Malietoa ma Taimalelagi le Talalelei i Sapapali'i.⁵² A ua fa'ama'ite e le Agaga o le Atua le loto o Matetau o Apai Manono, e fesoasoani i le galuega a Ioane Viliamu ma lona auvaa. Ou te talitonu, o le manatu o Matetau afai ua taunuu le talalelei i Savai'i, ua tatau fo'i la ma onomea le

⁵⁰ Williams, 352.

⁵¹ Ibid., 354.

⁵² Moyle, 72-73.

Talalelei mo Manono auā o Manono e taulalata i Savai'i. E ui lava e va i vasa, ae a fua i le lototele o Matetau, fai mai le tala na aloalo lava i lona paopao ma agai i Savai'i. E peiseai ua tupu lona faatuatua ina ua maua tala, i le oo mai o le Talalelei i Samoa.

Peitai o Matetau sa lē o se tagata faigofie. O le tagata fai taua, sa toto lima, sa so'ona ulavale i taimi o le pogisa ma le fefulituaa'i. Auā a fua i nisi o fa'amaumauga po o tusitusiga a Viliamu, o Matetau o se tagata sauā, o se ta'ita'i'au fa'amoemoeina i taimi o taua i Samoa, o se toa mata'utia ma le malosi. Peitai ua avea Matetau ma Tiakono, tausaga e 1838, o se toa ua ia fa'atupu le filemū i le nu'u ma le galuega a le Atua i Apai Manono.⁵³

Ua lē o toe tama o le pogisā, a ua liua ma tagata o le malamalama. Ua lafoa'i au'upega fa'a-le-lalolagi semanū a maumau ai le ola, a ua faaaoga le soifua mo le feau ma le galuega a le Atua, ae le gata i lea, ua ia manatu mo se lumanai manuia ma se suiga fou o lona nu'u i le taunu'u mai o le Talalelei. O le fa'aalia lava lea o le mana Silisiliese o le Atua ma lona Finagalo alofa i ona tagata.

O lo'o fa'amauina foi e Richard Moyle le fa'amatalaga a Matetau ia John Williams i le 1832 e faapea, o le a ia fauina se malumalu i le maua mai o se faiaoga mo ia ma ona tagata i Manono.⁵⁴ O lona uiga o le loto o Matetau ua mau i le Talalelei ma ua ia sauni e totō le fatu o le galuega a le Atua i loto o ona tagata ma lona nu'u. A o se fa'amoemoe o le a lē toe solomuli ai lava.

⁵³ Ibid., 82.

⁵⁴ Ibid., 85.

2.1.2 Matetau ma Faiā'oga

Ua fa'atagaina e Matetau le ulufale mai o faia'oga o le Talalelei i Apai Manono. O Teava, Thomas Heath, (Misi Ite) ma Marama. O i latou na faia a'oga ma amata le lotu i Apai Manono ma fa'asolo atu ai i isi pitonuu o Manono e pei o Salua, Faleū ma Lepuia'i. O le mafua'aga lea o le tofu uma o pitonuu nei e fa o le motu o Manono, ma le lotu EFKS e oo mai lava i le asō. Ua tatala e Matetau le faitoto'a mo le ulufale mai o le Agaga o le Atua Soifua, le Atua o le Ola, ma le Atua o le Manuia ma le Filemū i lona nu'u. O le nu'u sa nofo pogisa e leai se malamalama. *“O le nuu sa nofo i le pouliuli, ua latou iloa le malamalama tele; o i latou fo'i sa nonofo i le nuu ma le ata o le oti ua alu a'e le malamalama ia te i latou”*

O Teava, Thomas Heath (Misi Ite), Marama faatasi ai ma le lagolagosua a Matetau, o i latou ia sa avea ma ivitū o le lotu i Apai Manono, i le fa'amaopoopoina o le itū i fafo atoa ma le fa'alēagaga. Ua fai lava lea ma fa'amalosi'au i le fa'atuatua mu'amu'a o nai tagata o Apai ua faatoa amata ona liua o latou olaga mai le pogisā i le malamalama.

O le a'oa'oina o le faiga o Tapua'iga, o le fatuina o pese lotu ma le saunia o tatalo ma le fa'amatalaina o le Tusi Paia, ua avea ma laasaga aupito talafeagai ina ua nofofale le atamai e faitautusi ma tusitusi. E le'i fa'atapula'aina e misionare le a'oa'oga tau o le itū faalēagaga, ae sa a'oa'oina malosi fo'i mataupu o le poto salalau e iai le numera ma le tala i le lalolagi e o'o lava i le atamai fa'asaïenisi. A o le sini fa'amoemoeina o nei a'oa'oga, ia

avea le kerisiano ma tagata e ola i le amio pulea ma le fa'atuatuaaina i le ekalesia ma le Talalelei a Iesu Keriso.⁵⁵

O le fa'amoemoe ua tataua ona ave iai le fa'aupuga, "o le punāvai o le atamai".⁵⁶ O le "punāvai 'auā e manino i ona fa'aupuga le fa'amoemoe e momoli ai lagona; lagona o le fiafia, tainane lagona o le filemū ma le faatupu filemū. O le "atamai" auā e 'oa i ana fa'aupuga ma o fa'aupuga o le ola fou. O le o'o mai lava lea o le malamalama i le pouliuli ma le Fa'aolataga o ona tagata. O le atamai e lagona ai e so'o se tagata le tusa'afia ma le fa'amoemoe e tupu ai le mautinoa e fa'atau ai i le feau ma le mana'o o Matetau. O le atamai o misionare ma le meaalofo ua tuu iai e le Atua, lea ua 'oa'oa ai i Faleseu ma sa'a ai i ma'a o mālie augātupulaga o le talutalufou ona o le Talalelei ma le Fa'aolataga ia Iesu.

2.1.3 Fa'amavaega ma Matetau

A toe tomanatu i upu taumavae a Matetau, e telē lava se feau mo le nu'u o Apai. O se feau e ao ina momoli i lea augātupulaga ma lea augātupulaga, auā o le feau e fa'aauau ma tu'ufa'asolo i tupulaga lalovaoa. O le sa'ili'iliga lenei ua maua ai i le Sulu Samoa Numera 8 (Ianuari 1848 Vol 3. Samoa) upu taumavae a Matetau, tausaga e 1847, i lona aiga ma le nuu ina ua lata lona maliu. Fai mai a ia,

Ia outou nofo sauni; auā o le itu aso tou te lē manatunatu ai e sau ai le atali'i o le tagata;...ia outou taofi lava i le Afioga a le Atua ma anaana iai.

⁵⁵ Fauolo, 73.

⁵⁶ Tuiatua Tupua Tamasese Taisi Tufuga Tupuola Efi, *Talanoaga Na Loma Ma Ga'opo'a* (Apia, Samoa: Pacific Printers and Publishing Ltd, 2000), 5.

Na matuā tatalo ma fa’atoga atu i le Atua ia talia lona agaga i lugā ma ia alofagia lona aiga ma lona nuu ma ia manuia le galuega a le Atua.

O le Sulu Samoa e pei ona ta’ua i luga, o loo iai le molimau a Thomas Heath i le maliu o Matetau, tausaga e 1847:

Talu ina fa’atoā o mai o faifeau i Samoa nei, na fa’asaga le finagalo o Matetau i le Afioga a le Atua. O le ali’i sa agamalū ma amio filemū. Talu ona lotu o ia, ua lafoa’iina ana fana ma au’upega sa tau ai anamua; e le’i toe fia fai ma toa fa’a- le lalolagi nei, a ua fa’amalosi i le taua e sili ona lelei. Sa fa’atupu e ia le Afioga a le Atua ma le amio Atua.

2.2 Teava

O le taunu’u mai o Teava ma aumau i Apai Manono na amata ai loa ona fai a’oga mo Matetau ma ona tagata, aemaise o le motu atoa. Ua iai le fanua ua tuuina atu e Matetau ma ona tagata e aumau ai Teava ma le faletua. O lena fanua o lo’o fai nei ma fanua o le augā Faifeau o Apai e o’o mai lava i le asō. O lo’o iai le tulaga Falesā o lo’o iloga lava i le taimi nei lona fa’avae i totonu o lea fanua. E faapea le tala, o le ulua’i falesa lea o Apai i na taimi mo tapua’iga. E le o māua le aso ma le tausaga na fausia ai, peita’i o le mau fa’atusatusa a le Faifeau⁵⁷ o lo’o iai i le taimi nei, ma le Api o le Galuega e fa’apea, o le va o le 1832 ma le 1835 sa fausia ai lenei Falesa. E o’o a fo’i i fale mautū i lea lava nofoaga sa tapena lelei e Teava mo a’oga auā ua autova’atu iai tagata o le motu o Manono mai isi pitonuu e pei o Salua, Faleū ma Lepui’ai. Ua mautū le nofoaga mo Teava ona o le lagolago malosī o Matetau ma lona nu’u i le galuega a le Atua ma le Talalelei. O se faiga pito i sili ona

⁵⁷ “Fa’atalatalanoaga ma le Susuga i le Fa’afeagaiga iā Iona Leau Paaniani,” faife’au o le EFKS i Apai Manono.

tāua ma aogā ua faia e Matetau mo le fa’a talaleleiina o tagata Apai ma Manono atoa.



Ata 3: Nofoaga o le ulua’i falesā na fausia e Teava i le va o le 1832 – 1835.⁵⁸

E iai le talitonuga o le lolofi mai o tagata o isi pitonuu i a’oa’oga a Teava na mafua ai ona o’o atu le feau ma le galuega a le Talalelei I isi pitonuu. O lona uiga e lē itiiti le sao tāua o le ali’i o Matetau, e ala i lona faavaeina o le Talalelei a Iesu i Manono, ma ua tupu ma tāuluola ina ua taunuu le faia’oga mai Rarotonga. O le to’atele o Tusitala o lo’o latou fa’amaumauina tala o galuega lelei a Teava ma iloa ai o Teava na matua iloga lona tula’i mai i le tapenaina o le galuega a le Atua.

O le tausaga e 1834 na toe malaga ai Viliamu ma le faletua i Peretania ma taunuu i le masina o Iuni, a ua galulue loa fo’i le Au Matutua i Lonetona e feso’otai ane i le aufaigaluega misionare i Tahiti ma Rarotonga, ina ia lē tu’ulafoa’iina le galuega i Samoa, ao toesea Viliamu. O lea na malaga mai ai Misi Papu (Rev. Charles Barf) ma Misi Pusakota (Rev. Aaron Buacott) i le

⁵⁸ Ata na pu’eina e Berekar Kennar, Aso 7 o Aperila 2019.

fa'aiuga o le 1834; ae na malaga mai Misi Peleti (Rev. George Platt) ma Misi Uilisone (Rev. Samuel Wilson) ia Tesema i le 1835. E ui ina pu'upu'u le taimi o i latou nei i Samoa, a o lo'o fa'aalia i fetusia'iga ma Lonetona le telē o lo latou sao i le fausia ma le atiina a'e o le Gagana Samoa tusitusia. A o le tausaga lava fo'i lea e 1835 na taunu'u ai i Manono le alii o Misi Tana (Rev. Peter Turner) mai le Uesiliana ma fa'avaeina ai le Lotu Metotisi i Manono.⁵⁹

O lo'o iai le mau e faapea, o le taule'ale'a Tonga e igoa ia Mafoa na ia aumaia le Lotu Tonga i Manono i le 1834. Na sau e momoli mai le afafine o Matetau o Salote, sa fai ma masiofo a le Tupu Tonga, faatasi ai ma le anoano o meaalofa mo lona aiga i Apai. A o aumau ai o ia i Apai, sa fai lava ma ana masani le tapua'i e ala i le usuina o pese lotu ma tatalo i le gagana Tonga, ae sa le'i fa'alauiloaina.⁶⁰

I nisi fo'i o tusitusiga o lo'o iai, e to'atele tagata Tonga ma Samoa na latou aumaia le Lotu Tonga i Samoa, i le ma'ea ai o le fa'atalaleleiina o le Tupu Tonga ma tagata o Haapai i le 1827.⁶¹

2.3 Peter Turner

E taunu'u Peter Turner i Manono ua iai le Metotisi i Apai. O fa'amaumauga nei e iloa ai, o Apai fo'i na muamua iai le Lotu Tonga ao lei taunu'u Peter Turner ma faia'oga Metotisi ia Le'iataua i Feleū Manono. Peitai o le taunu'u mai o Mafoa ma Salote i Apai Manono ma le lotu Tonga sa le'i fa'alauiloaina, ae sa fai lava o se la masani i le olaga na ola ai i Tonga.

⁵⁹ Fauolo, 74.

⁶⁰ Fineaso T. S. Fa'alafi, *Carrying the Faith. Samoan Methodism: 1828 - 1928* (Apia, Samoa: Piula Theological College, 2005), 41.

⁶¹ Ibid., 38.

Sa lei mamā i finagalo o le LMS le tulau'ele'ele o Peter Turner i Manono auā o lea ua olaola le galuega a Teava. Ae ui fo'i i le filogia o le tapuaiga i Apai ona o le lotu Metotisi, ae sa sologa lelei lava sa leai se vevesi ona o le fa'atautaiga lava a le ali'i o Matetau ma lona nuu.

O le tausaga e 1836 na taunu'u ai i Samoa le vaa o le "Dunottar Castle" sa Malaga mai ai misionare fou e to'aono mai Peretania. Na ui ane i Tutuila ma tu'utaula i gatai o Leone, ma fai ai le tofiga o le a galue George Barnden i Leone. O Archibald Wright Murray mo Pagopago, o Williams Mills mo Apia, o Thomas Heath (Misi Ite) i Manono i le mea o nofo ai Teava, ma ua saunia lelei e Teava le maota talafeagai mo le misionare papalagi. O Charles Hardie i Sapapalii, ma Alexander McDonald i Safune. O misionare la nei na amata ai loa ona tele tusitusiga e uiga i le galuega i Samoa, e pei ona fa'aalia i fetusia'iga ma ripoti sa ave i Lonetona.⁶²

2.4 Misi Ite

O le taunu'u o Misi Ite i Manono i le 1836 ua o se itū lelei mo Teava ma le nu'u o Apai, ma ua atili mausalī ai le faamoemoe o le lotu, e ui lava i le iai o Peter Turner ma faia'oga Metotisi I le motu o Manono.

E o'o mai i le 1837 ua matuā mautū le lotu i Apai i le galulue va'ava'alua ai o Teava ma Thomas Heath, faatasi ai ma le lagolagosua a Matetau ma le nu'u. Ua iai le fanua mo Teava ma Misi Ite, a ua amata ona silasila Matetau i se tulaga lelei mo se falesa e sili atu. O lea na fai ai le fa'aiuga, o le a fo'ai le fanua e igoa o Feletoa, mo le falesa.⁶³

⁶² Fauolo, 72.

⁶³ Tuilaepa Fuava: o le matai o le aiga o Matetau i Apai Manono.

O le tausaga fo'i lea, 1837 na papatisoina ai le ali'i o Matetau e Misi Ite i le sua Esekia, o le igoa o le tupu o Isaraelu. O le tausaga lava foi lea ua filifilia ai o ia e fai ma tiakono o le lotu. O le alii lenei sa agamalū ma amio filemu talu ona lotu o ia, ua lafoai ana fana sa tau ai anamua. Sa tau faatupu e ia le Afioga a le Atua ma le amio Atua.⁶⁴ O le tausaga e 1838 na tofia ai Teava e galulue ma Misi Mare i Pagopago.

Ua amata ona mautu le galuega i Samoa, na soo le atunuu atoa i le Talalelei, ma ua lava le aufaigaluega. A o lo'o mu pea le agaga o le fia fai mea lelei mo isi atunuu o le Pasefika o lo'o pouliuli pea. Ua fia maua se autau mai Samoa. Ua tali atoa nei le sefulu tausaga o le malo o Iesu i Samoa. Ua fa'atoā tasi le tausaga talu ona nofo Viliamu ma le faletua i Fasito'o-tai.

Ua fai le fono i Fasitoo-tai i le aso 6, Aokuso 1839. Ua tuu atu ai i luma o Samoa pe iai nisi e ofo mai e fia tala'i le Talalelei i nu'u ese. Sa fia maua se toa 9, ae na ofo mai le to'a 34. Ona filifilia lea le to'asefulu lua muamua e pei o le au Aposetolo.

Na filifilia le to'a 12 e aofia ai Leiataua o Manono. O le aso 6 Novema, 1839 na tuua ai Samoa e Viliamu ma lana vaega'au e to'asefulu ma le lua, o ulua'i misionare mai Samoa.⁶⁵

O le taeao o le Aso Lulu, 20 Novema 1839 na latou o a'e ai i uta i Eromaga i Vanuatu, i le tulula ona fasia ai lea o i latou e tagata fa'apaupau a'o taumafai ona fa'ao'o atu ia i latou le Talalelei o le filemu. Na maliu ai Viliamu i uatogi a tagata Eromaga, ona muta ai lea o toe upu na tusia e Viliamu i lenei lalolagi.

⁶⁴ *Sulu Samoa* No. 8 (Ianuari 1848. Vol 3. Samoa).

⁶⁵ Faletese, 18.

Na maliu ina ua 43 tausaga ma masina e 5 o lona soifua; a o lo'o ola pea le agaga ma lana galuega.⁶⁶

O le tausaga e 1840 na tulai ai le isi autau mai Samoa. O le lona lua ai lea o malaga faamisionare a Samoa mo le Vasa Pasefika i Saute, ma sei toe taumafai se avanoa e tuu ai se a'oa'o i eleele faamaligi toto o Eromaga, lea na fasiotia ai Ioane Viliamu. Ua tupu pea le faamoemoe fou mo feau lelei, o le mafua'aga lea o le iai pea o nisi e ofo mai e fia galulue. O le malaga lea o lo'o ta'ua ai, o Misi Ite le tautai fou. Ua iu foi le fono a faifeau ma ua aufa'atasi ai e tofia Misi Ite e ta'ita'i i le galuega a le Atua e momoli atu isi a'oa'o Samoa e taumafai le galuega i nu'u ese. Sa faia se sauniga pu'upu'u na lauga ai Teava, soso'o ai ma le tatalo na fai e Misi Ite. O le malama o le taeao o le aso 10 o Aperila na tu'uva'a ai lea autau filifilia.⁶⁷

E to'alua foi sui o Manono sa auai i lea malaga. O Atamu ma Mataio. A o le Malaga i le 1839, sa auai foi Leiataua o Manono. O fua ia o le solosolo manuia o le lotu i Manono, taluai galuega lelei a Matetau, Teava ma Misi Ite. Lea lava ua agai e avea ma misionare i nu'u fa'apaupau, o toa o le Talalelei.

O le tausaga lava lea e 1840 na i'u ai le fono a ali'i misionare o le a fa'asaga i le fa'aliliuina o le Tusi Paia i le Gagana Samoa. O le a fa'asaga muamua i le Feagaiga Fou, ma ua vaevaeina ia tofu le misionare ma ana Tusi e fa'asaga iai. Na tofia Misi Ite i le fa'aliliuina o le Evagelia a Ioane; Roma, Kalatia, Efeso, Filipi, Kolose, I Tesalonia, II Tesalonia, I Timoteo, II Timoteo, Tito, Filemoni, I Ioane, II Ioane, III Ioane ma le Iuta. Sa tele ina galulue fa'atasi Thomas Heath ma Misi Ale (The Rev. Hardie).

⁶⁶ Ibid., 21.

⁶⁷ Fauolo, 86.

O le mae'a ai o le Feagaiga Fou ona fa'asaga fo'i lea i le Feagaiga Tuai, na tofia ai Misi Ite na te fa'aliliuina le Esoto ma le Salamo e 51 – 150.

Na mae'a galuega mo le Feagaiga Tuai i Samoa nei i le 1855. Ua atoa le Tusi Paia i le Gagana Samoa. E ui i lea sa toe tofia pea ali'i Misionare popoto i le gagana latou te toe iloilo ma toe teuteu le Tusi Paia Samoa atoa. Sa faia lēna galuega tele i Avao Savaii. Na fesoasoani iai ali'i Samoa o Malaitai o Lefagaoali'i, Va'aelua o Lalomalava, Talavou o Sapapali'i, So'oalo o Samauga, ma Maiava o Sato'olepai.

E le o se tagata fa'atauva'a le tagata lenei o Misi Ite, sa tofia e avea ma failautusi i le sosaiete o Misionare i Samoa, o se uluai Misionare papalagi mo Matetau i Manono, o le uluai fa'atonusulu, a le LMS⁶⁸ ao lea foi ua matauina lona sao tāua i le fa'aliliuina o le Tusi Paia i le Gagana Samoa.

E foliga mai o le tofia o Matetau e avea ma Tiakono i le Ekalesia i Apai, ua fai ai o ia ma tagata e vaaia le Ekalesia i taimi e toesea ai Misi Ite, ona o se tagata e tele ona agava'a ma ona silafia i le galuega talai, ae o Apai Manono lava lona fa'asinomaga.

E lei nofoa'i le Misionare ao galue i Apai. Sa silasila mamao ina ia 'aia lava nei toe afāina le galuega a le Atua e tusa ma le naunau o Matetau, ua foa'i ai fanua mo le galuega a le Atua. Ona manatu lea o Misi Ite, ia tumau le galuega i Apai. Ona agai loa lea e fa'amautū le fanua lenei, ina ia taatia i sona fa'avae mautu.

Ua fa'amalosia e Misi Ite le faia o se feagaiga fa'a le tulafono (sainigalima) i le fanua e pei ona ta'ua.

⁶⁸ Faletese, 65.

O lo’o faamauina i lea feagaiga, “ua tuuina atu ma faatau atu e Esekia o lona fasi fanua e fai mo Misi Ite e fa’atu ai ona fale ma toto ai ona laau ma faitalia lava ia iai”. Sa avatu foi e Misi Ite sina oloa e totogi atu iai. Afai foi e lutia Misi Ite pe oti ia, a ua fa’atauina ma tu’uina atu lea fasi fanua e aumau ai ma fai le galuega a le Atua i Manono.

Ua faamauina i lenei tusi o le feagaiga a Tuilaepa Matetau poo Esekia ma Thomas Heath, na fa’amaonia e Tuilaepa Esekia ma se tasi atali’i o Esekia fa’apea isi o lo latou aiga ua tusia o latou igoa i lenei tusi.⁶⁹

Ua faaalua lava le agalelei o Matetau i le misionare e avea ma faifeau i Apai. Lea lava na tino mai lona tausia lelei o se faia’oga e pei ona manao ai mo lona nu’u.

O le tausaga e 1842, na taunu’u ai fo’i i Samoa le faiaoga Rarotonga o Marama ma lona faletua. Sa tofia loa fo’i e galulue i Manono faatasi ma Thomas Heath. Sa tele le fesoasoani a Marama i le galuega, i le tausiga o le aulotu i Apai, ma isi aulotu i nu’u e tau lalata ane, sa i lalo o le tausiga a le misionare; auā ua tele le taimi o le misionare e alu i le faiga o le nusipepa a le Ekalesia, o le “Sulu Samoa” e pei ona avea ai o ia ma ulua’i Faatonu Sulu. A o le tausaga e 1845, na siitia ai Marama ma le faletua i le Kolisi i Malua, ona ua manaomia mai ai fo’i la laua tautua. Sa galulue ai pea i laua i Malua e o’o i le tausaga e 1873.⁷⁰

2.5 O le maliu o Matetau

⁶⁹ "Memorandum of Confirmation ", (Tuilaepa and others to Thomas Heath, 16th September, 1847).

⁷⁰ Fauolo, 43.

Na papatisoina lenei ali'i, ua igoa ia Esekia, a o ona suafa tuai o Tuilaepa, ma Tuipapalagi, ma Matetau. Ua maliu ia i le masina o Aperila 1847. Na fetagisi ma faanoanoa ni toatele ina ua maliu o Esekia, a o le taofiga lenei ia te ia, sa maliu ia ma le faatuatua ia Iesu. Na silafia e ia ua latalata lona maliu, ona fa'amavae lea i lona aiga ma le Usoali'i, ma aioi atu ia te i latou ia latou taofi lava i le Afioga a le Atua ma anaana iai. Ua na matuā tatalo foi ma fa'atoga atu i le Atua ia talia lona agaga i lugā ma ia alofagia lona aiga ma lona nu'u ma ia manuia le galuega a le Atua.⁷¹

2.6 O le maliu o Misi Ite

O le misiterio lilo lea, ma se fesili auā o lo'o le iloa e le nuu o Apai se fa'amatalaga e uiga ia Misi Ite po'o fea ua fai iai. Peitai o tusitusiga a Kenape T. Faleto'ese o lo'o fa'amaonia ai le tala ia Misi Ite.⁷²

Na taunu'u i Samoa i le tausaga e 1836, ma tofia i Apai Manono. O ia le uluai Fa'atonu Sulu. Na maliu i Manono i le aso 9 o Me, 1848. E felata'i lava le tausaga na maliu ai Misi Ite ma le tausaga na sainia ai pepa o le fanua o lo'o nofo ai i Apai Manono. A fua i tuugamau o lo'o iai i totonu o le fanua, ona fa'amaonia lava lea, o Misi Ite o lo'o lagomau ai lava i lona fanua i Apai Manono.



*Ata 4: O fanuamaliu o le Misionare ma Faife'au.*⁷³

Ua galoma atu Teava, ua mou atu Matetau, ua alu atu fo'i Misi Ite ma Marama, peita'i o lea ua fa'asolo i Faifeau Samoa ua i'u mai le Kolisi i Malua. Na ta'ua e le susuga i le Fa'afeagaiga⁷⁴ o le uluai Faifeau Samoa, i'u mai Malua, o Iona suafa o Mataupu, na tausi nu'u i Apai Manono, soso'o ai lea ma Pilitati, o lo'o fa'amaui i le Api o le Galuega. Ou te talitonu, o le Faifeau lenei na iai tonu i le taimi o le ulua'i falesa i le fanua ua ta'ua o Feletoa, lea na fa'atuina ai le falesa i le tausaga e 1881. O le fa'asologa lenei o faifeau na soso'o mai ai, ma faaauau le galuega i Apai Manono.

Faifeau	Tausaga	Nuu
Mataupu	?	?
Pilitati	?	?
Esekielu	?	Fasitootai
Tupulua	? – 1945	?
Logovae	1946 – 1955	Leulumoega Tuai
Enosa	1956 – 1983	Lotofaga
Afiga Timu	1985 – 1994	Nofoali'i
Iona P. Le'au	1996 – present	Levi, Saleimoa ⁷⁵

2.7 O le fanua o Feletoa

⁷³ Ata na pu'eina e Berekar Kennar, Aso 7 o Aperila 2019.

⁷⁴ “Fa'atalatalanoaga ma le Susuga i le Fa'afeagaiga iā Iona Leau Paaniani,”

⁷⁵ Api o le galuega: Apai. Manono Island; courtesy of Rev. Iona L. Paaniani.

O le fanua la lea o Feletoa, ua maea foi ona resitalaina fa'a lē tulafono
e le Komisi o Fanua a Samoa e faapea,

Ua tu'uina atu lenei fasi fanua e Tuila'epa Esekia⁷⁶ ma Silupe mo le
LMS ma le Falesā ua fa'atu ai e pulea e ana Faife'au.

O le autū o lenei fa'amoemoe;

Ia silasila ali'i ma ia iloa e tagata uma le Tusi Fa'amaonia ua
matou fo'aiina atu mo le LMS le fasi fanua e igoa o Feletoa o iai
i Apai i le motu o Manono, Samoa. Ua fo'ai le fanua ma le
Falesā ua tu ai, atoa ma mea uma o iai mo le LMS ia pulea e ana
faifeau. Ae a tupu se faigatā i le Falesā e le toe aiā matou po'o
matou fanau, po'o matou aiga foi e o'o i le fa'avavau.

O ali'i o le ekalesia i Apai na loto lava i le feagaiga ua
fo'ai ai lea fanua ma mea uma o iai mo le LMS ia pulea
e ana Faife'au

⁷⁶ O Tuilaepa lenei na suitulaga ia Tuilaepa Matetau Esekia ina ua malia i le tausaga e 1847.



Ua tusia o latou igoa i le aso nei o le aso 6 o Aperila 1881. T.A

Ata 5: Fanua o Feletoa.⁷⁷

O molimau o lo'o iai i lenei pepa fa'amaonia o lenei fanua, o Mose ma Ioane. O lo'o iai pea nei igoa i le aiga o Silupe e o'o mai i le taimi nei. O Silupe, o se tasi o tāmali'i o Apai.

O le Falesā e pei ona taua i pepa o le fanua lenei, e faapea le tala o le tausaga lava lea, 1881 na ma'ea ai ona fausiaina le uluai falesa i le fanua lenei o Feletoa. E le o se falesa telē, ae ua mautinoa ua sili atu lona lapoa nai lo le Falesā na fausia i le taimi o Teava.

O lona uiga, o lea lava ua loto tetele le nu'u e atiina'ae le tuputupu pea o le ekalesia ma lona agai i luma. Auā ua uma atu Teava, ua maliu Matetau, ua

⁷⁷ O le Falesā fou lena i le taimi nei, na fausiaina i le 2010. O le lona tolu ai lea o Falesā i le Fanua o Feletoa. O lumafale mai sa iai Falesā muamua e lua. (Ata sa pu'eina e Berekar Kennar, Aso 7 o Aperila 2019).

uma fo'i le soifua o Misi Ite, a o lea lava e tupu pea le fa'atuatua o Apai e fai
mea sili mo le galuega a le Atua.

VĀEGA 3: TU'UFA'ATASIGA O LE TŪSIGA

3.1 Aotelega

E matua'i tāua tele ia te a'u lenei Tala Fa'asolopito, auā o lo'o tu mati'e mai ai lava le tāua o tu ma aga ma suiga na fai e tua'a ua mavae. Talu ai e tulaga 'ese ai lava le aganu'u a Samoa mai ona uso fa'alelalolagi. O le aganu'u ma le agaifanua a Samoa o lona "i'oimata" o le FA'AALOALO.⁷⁸ O le Fa'aaloalo ua limata'itai'ina e le Tofā ma le Fa'autaga po'o le Moe .E leai loa se Fa'aaloalo, ona tupu lea o misa ma taua i fale ma fafo, amata i aiga e o'o lava i nu'u ma itūmālō. Sa talia lelei le o'o mai o le Talalelei i lafanua o Samoa e tua'a ua mavae, ma o le tali fa'aaloalo lea i le Afio mai o le Atua ma lana Fa'aolataga. Lea foi ua faia e Matetau mo Apai Manono.

O le Tofā ma le Moe o le fa'autaga loloto i tāmali'i ma failauga o se afio'aga. O le moe manatunatu mo le lumanai e agai iai tupulaga o le talutalufou.⁷⁹

O lona uiga, sa le'i moemoenoa le tofā ma le fa'autaga ia Matetau i le tausaga 1830, sa moe manatunatu, ma sa ia tapena le alāfua e savavali ai lona aiga ma le nu'u. O le tofā e ola ai le aiga, e lē gata i le tino, a o le mafaufau ma le agaga. Ua 'a'ave tala o Matetau, i le tala fa'asolopito o le lotu. Ona sailimalo lea o Matetau i le Talalelei. Ua leai a se eseese ma le sa'iliga mālō a Malietoa ia Nafanua, "Tali i lagi se ao o lou mālō". A o le tali o le sailiga a Matetau ia Ioane Viliamu, "Ou te toe sau ma aumai sau Faia'oga". O le tofā

⁷⁸ Lafai Sauoaiga, *O Le Mavaega I Le Tai* (Apia, Samoa: Malua Printing Press, 1988), 14.

⁷⁹ Tuiatua Tupua Tamasese Taisi Tufuga Tupuola Efi, *Su'esu'e Manogi. In Search of Fragrance* (Wellington, New Zealand: Huia Publishers, 2009), 382.

sa'ilimālō ma le silasila mamao mo le lumana'i o tupulaga ma le manuia i le Ola Fa'avavau.

Fai mai Ruperake Petaia, O le Talitonuga Kerisiano Samoa, e mafai ona fa'auigaina faapea, *“o se sulī mai le usuga a le Talitonuga Kerisiano a Misionare mai Sisifo po'o atunuu Europa, i tu ma aga a tagata Samoa”* O le feau autū o le Fa'atuatuga Kerisiano mai Sisifo, o le fa'alauteleina lea o le Talalelei i le Silisiliese o le Atua. Le Atua na foafoaina le lalolagi, ma saunia le Fa'aolataga mo tagata uma, e ala i le Toetū manumālō o lona Alo o Iesu Keriso. O le Talalelei o le filemu, alofa lē-fa'atuā'oia, loto maulalo ma le osi taulaga. O ia uiga lelei o le tofā fa'avae lea o tu ma aga a Samoa, ma lona olaga faa-lē-aganu'u mai anamua e o'o mai i le asō.⁸⁰

Na amatamea Teava i Apai Manono i le tausaga e 1832, taunu'u Thomas Heath (Misi Ite) i le 1836 ma galulue faatasi ai ma Teava. Na si'itia Teava i Pagopago i le 1838, ae fa'aauau e Misi Ite le galuega. Sa tele tuatuaigia o le misionare i le Ekalesia i Samoa. Sa avea ma Faatonu o le Sulu Samoa, sa o latou fa'aliliuina le Tusi Paia, tausaga e 1840, i le gagana Samoa, i lalo o le taitaiga a Rev. George Pratt (Misi Parate), ma isi uso a misionare. O George Pratt na taunu'u mai i Samoa i le 1839 ma galue ai mo tausaga e fasefulu. Sa avea lava lana taleni o le atamai i mea tau gagana, aemaise lava i le faa-Eperu ma le faa-Eleni, ma mea na taiulu ai o ia i le fa'aliliuga o le Tusi Paia. Sa viia fo'i o ia e nisi o misionare sa latou galulue, i le manaia tele o lana faa-

⁸⁰ Ruperake Petaia, *O Le Inailau Na Au Ma Le Meaalofa O Le Kirisimasi* (Apia, Samoa: Malua Printing Press, 2008), 94.

Samoa.⁸¹ Na taitai fo'i e Misi Ite le malaga a misionare Samoa mo le Vasa Pasefika i Saute i le 1840, lea na auai ai Mataio ma Atamu o Manono.

Na taunu'u i Samoa Marama, le isi faia'oga mai Rarotonga i le 1842, ma tofia e galue i Apai Manono. Ai lava o le tuatuagia tele o Misi Ite i ona tiute faa-le-ekalesia ona o ona tomai ma agavaa. Na galulue ai lea o Marama ma fesoasoani i le misionare i Apai Manono. Peitai na toe si'itia Marama i le Kolisi Faa-faifeau i Malua i le 1845 ma galue ai, ona o le mana'omia foi o lona agavaa, ae sa iloga lona sao i Apai ma isi aulotu i Manono a'o galulue ai. O le Kolisi i Malua na amata i le 1844 ma avea ma Kolisi o mea tau le Atua. Sa fa'aalia ai e se tasi o ē na fa'avaeina, (Rev. George Turner) le sini ma le fa'amoemoe ina ia tofusia ai nu'u uma i Samoa ma se Faifeau, ua a'oa'oina lelei ma ia auauna atu ai i atunu'u e le'i o'o iai le Talalelei.⁸²

Na maliu Matetau i le tausaga 1847, a ua tupu ma ola le lotu i Apai Manono. O lona lea sao i le aiga ma le nuu, e manatua ai pea lona soifuaga e so'o se tagata o le nuu, ona o lona tala'aga i ana mea na fai. O ia o le poututoa o le galuega a le Atua. O ia o le faitoto'a o le Afio mai o le Atua ma le o'o mai o le lotu i Apai Manono.

Na maliu Misi Ite i Manono i le aso 9 o Me, 1848, e pei ona tā'ua e Kenape T. Faletese i lana Tusi, "*A History Of The Samoan Church (LMS)*." O le fa'aaliga lea o loo mautu ai lava le talitonuga o augā-faifeau i Apai, le lagomau ai o lenei misionare i le fanua o faifeau i Apai. Ma o lo'o maua fo'i i fa'amaumaga a Enosa⁸³ e faapea o Misi Ite o lo'o lagomau lava i Apai. O nei

⁸¹ Fauolo, 73.

⁸² Faletese, 31.

⁸³ Faife'au tausi nu'u EFKS Apai, Manono, 1956 – 1983

fa'amaumauga sa talanoaina ai i se tasi o fanotaga a le aulotu le faia o se ma'a fa'amanatu mo Misi Ite.⁸⁴

O le fanua o lo'o aumau ai Faife'au ua maea ona resitalaina faa-le-tulafono ma ua fo'ai atu mo Misi Ite ma le LMS, ma o lo'o saina ai lava Misi Ite.

Ua mautū le fanua e aumau ma nonofo ai le aufaigaluega, o faia'oga ma misionare, lea ua aumau ai Faifeau Samoa e o'o mai i le asō. Latou na i'u mai le Kolisi i Malua ua soso'oina ma fa'aauau le galuega na amata e Teava, Thomas Heath ma Marama.

Na foa'i fo'i e suli o le aiga o Tuilaepa Matetau ma le aiga o Silupe le fasi fanua o "Feletoa" mo le malumalu tapua'i o Apai. Ua uma ona resitalaina i le Komisi o Fanua Samoa, e avea ma meatotino a le lotu i Apai ma le LMS i le aso 6 o Aperila 1881.

3.2 O se va'aiga i le lumana'i

E tāua tele i lenei Tusiga le tausaga e 1881. Auā e foliga mai e o'o mai le tala'aga o le lotu i Apai i le 1881, ua leai se mea o toe fa'alavefau. Ua mautū fanua ma le Falesa, o le falesa lona lua lea, a ua sili atu i le falesa na amata ai le lotu e Teava. O le ala fo'i lea o le taumafai e fa'amuta le Tūsiga i le 1881, ona ua maea tapena mea uma i le lotoifale o le lotu. E ui ua maliliu ma toe fo'i nai faia'oga na amataina mai i le 1832, a'o lea lava ua fa'aauau e

⁸⁴ Api o le galuega: Apai. Manono Island; courtesy of Rev. Iona L. Paaniani.

Faifeau Samoa mai Malua, i le mǎelegā ma le lototele ma le fai mea sili mo le galuega a le Atua.⁸⁵

O Malua ua telē lona sao i le Talalelei i Samoa ma le atu Pasefika. O le fa'atuina o Malua i le 1844, o le faamoemoe mo le galuega i Samoa, ma e o'o mai i le 1860 ua ausia lea manulauti ina ua tula'i mai a'oa'o Malua ma o latou faletua, latou te fa'afoeina le galuega fa'a faifeau i le tele o alalafaga ma isi atunu'u o le Pasefika.

Atonu o le mafua'aga lea o le fa'alagiga o Malua, o le 'Matua'. Auā na mua i le itū fa'a le a'oa'oga faapea le galuega a le Atua i Samoa ma le Pasefika. Auā e ui na mua i malae Takamoa i Rarotonga i le 1839, ae ina ua fa'avae Malua i le 1844, na vave lava ona i luma lona taumua i le a'oa'oina o faifeau ma o latou faletua mo le fa'atalaleleiina o le Pasefika. Manatua fo'i, o Malua le ulua'i a'oga faa-Ekumene, sa a'oa'oina ai a'oa'o mai Vanuatu, Laoiti, Tuvalu, Niue, Kiribati ma isi mo le galuega tala'i.⁸⁶

E o'o mai i le 1870, ua fa'amatu'u i Faifeau Samoa le tele o galuega sa faia e misionare papalagi. E pei o le faiga o Fa'amanatuga, taita'iga ma le va'aiga o Matāgaluega ma isi. O le vaitaimi fo'i lea ua amata ona tupu le agaga o le fia tuto'atasi o le Ekalesia Samoa. O se tasi o lagona ua alia'e, o le manatu o Faifeau Samoa, ua tataua ona tulaga tutusa i latou ma Misionare, ma ua tataua fo'i ona iai so latou leo i le ta'ita'iga ma le pulega o le Ekalesia. Ma i

⁸⁵ Meleisea, 59.

⁸⁶ Rev. Dr. Latu Latai, "Tala I Aitu, Aganuu, Galuega Faafaifeau Ma Le Talalelei: O Se Toe Tepa I Le Talafaasolopito O Le Ekalesia Lms Samoa 1830-1962," *Malua Journal*, no. 1 (2019): 67.

le 1875, sa fa'amalie ai ia lagona e ala i le fa'avaeina o le Fonotele ma le fa'au'uina o Faifeau Samoa, o ulua'i Faife'au ua fa'au'uina i le Pasefika.⁸⁷

O le tula'i mai o Faife'au Samoa ma o latou faletua e tau'ave le galuega, o se fesoasoani tele lea i le fa'aleleia ma le aga'i i luma o le Ekalesia. Ua avea ai le faife'au ma lona faletua o nisi pito i fa'aaloalogia i totonu o nuu. O se tasi o mafua'aga, ona o le maualuga o le tulaga o le a'oa'oina.

E o'o mai i le amataga o le seneturi e 20, ua fa'alagi le faifeau ma lona faletua o mātua fa'aleagaga o nu'u. Ua ave iai le fa'atuatuaga mo le a'oa'oina o fanau i le Tusi Paia ma le poto salalau. E lē na o le itū fa'aleagaga, ae taulamua i isi galuega e pei o taligāmalo, failautusi, e fa'amauiina ē fananau, feoti, ma faaiipoipo. O le faletua ua tele fo'i ona nafa, o le ta'ita'iina o Aoga Aso Sa ma mafutaga a Tinā, a o ia fo'i ua iai le tomai fa'a foma'i e fa'ainuina vai a tamaiti, a'oa'o tinā i le tausiga o fanau faapea le soifua maloloina i totonu o nu'u.

E aogā tele lenei sa'ili'iliga mo le tama ma le teine Apai Manono i so'o se vaipanoa o Samoa ma so'o se tafā o le lalolagi. Ou te talitonu fo'i, o le a fai ma lu'i ia i latou o tamafanau a le afio'aga, ma tosina mai ai o latou loto e fa'aauau, ma soso'o lenei galuega seia tau mai i lenei vaitau ma le tulaga solo lelei ua iai le lotu i nei aso, ma faatusatusa i lona tau amataina. I le ma lea, e tāua tele le iai o fa'amaumauga tusitusia lelei mo le lotu i Apai, ae aogā fo'i i le Tala Faasolopito ma fa'amaumauga a le Ekalesia Aoao.

E tatau i tupulaga o Apai ona solisolimulivae i le tautigā na asaina e tua'a ua mavae mo le soifua fa'aleagaga ma le manuia fa'avavau. Auā o le upu

⁸⁷ Richard Lovett, *The History of the London Missionary Society 1795-1895*, vol. 1 (London: Oxford University Press, 1899), 402.

moni, se a le aogā o lenei lalolagi ae maumau ai le ola? Ia faaaoga tatau le malosi ma le ola mo le Atua ma lona finagalo.

E aogā fo'i mo so'o se tagata lenei sa'ili'iliga pe a su'esu'e ma faitau iai. O le Tala Fa'asolopito o le lotu i Apai Manono ua iloa ai mea na tutupu i aso ua tuana'i, e momoli mai i molimau e uiga i tagata na amataina le lotu. E tāua le molimau i soifuaga o mātua ua sagaipouli ma fai i lagi a latou folauga, ma toe fa'amanatu e nisi o fa'amatalaga le fa'avaeina o le lotu i Manono.

O se lu'i fo'i mo tagata o Apai ina ia avea i latou ma lamepa e susulu atu, e lē gata i le tala'iina atu o le finagalo o le Atua, a o le soifua ma ola i le amio pulea lelei ma le loto maulalo, ma le soifuaga fa'a Kerisiano e tusa o le Afioa a le Atua. Ia mafai ona fa'aolaola pea le Talalelei i le nu'u ma le atunu'u. E tatau ona lototetele ma avea ma toa o le galuega a le Atua.

Ua mautinoa ai fo'i i lenei Tusiga, o le Misionare lava o Thomas Heath poo Misi Ite, na maliu i Manono. A o se fa'atupu manatu mo le Ekalesia, ina ia fa'atuina se Ma'a Fa'amanatu mo le EFKS e fai ma pine fa'amau o le galuega Fa'a Misionare a le LMS i le amataga. Auā o lea ua lata i le luaselau tausaga talu ona fa'avaeina le Ekalesia i Apai, e o'o mai lava i le asō, e na o le EFKS lava le Ekalesia o loo iai nei.

E talitonu fo'i o lenei Tusiga o le a fa'aosofia ai lagona o tupulaga latou te sa'ili'ili atili ai i le Tala Fa'asolopito o le lotu, auā o lea ua ta'oto lona tala'aga ma le fa'avaeina mai le 1830 i le 1881. O le galuega sa tautigā ai Matetau ma le Usoali'i, o aiga o Apai mai lava i lenā taimi, o aiga fo'i na o lo'o iai i le taimi nei i le afio'aga.

Tusi na Fa'aogāina

- Buzacott, Rev. R. *Mission Life in the Islands of the Pacific*. Paternoster Row, London: John Snow and Co. Ltd., 1866.
- Efi, Tuiatua Tupua Tamasese Taisi Tufuga Tupuola. *Su'esu'e Manogi. In Search of Fragrance*. Wellington, New Zealand: Huia Publishers, 2009.
- . *Talanoaga Na Loma Ma Ga'opo'a*. Apia, Samoa: Pacific Printers and Publishing Ltd, 2000.
- Fa'alafi, Fineaso T. S. *Carrying the Faith. Samoan Methodism: 1828 - 1928*. Apia, Samoa: Piula Theological College, 2005.
- Faletoese, Kenape T. *A History of the Samoan Church (Lms)*. Apia, Samoa: Malua Printing Press, 1959.
- Fauolo, Oka. *Vavega O Le Alofa Laveai. O Le Tala Fa'asolopito O Le Ekalesia Fa'apotopotoga Kerisiano Samoa*. Apia, Samoa: Malua Printing Press, 2005.
- Garrett, John. *To Live among the Stars*. Suva, Fiji: WCC and USP, 1970.
- Henry, Bro. F. *History of Samoa*. Apia, Samoa: Commercial Printers, 1979.
- Heslin, Rev. Father. SM. *A History of the Roman Catholic Church in Samoa, 1845 - 1995*. Apia, Samoa: Ed. M. B. Tyquin 1995.
- Latai, Rev. Dr. Latu. "Tala I Aitu, Aganuu, Galuega Faafaifeau Ma Le Talalelei: O Se Toe Tepa I Le Talafaasolopito O Le Ekalesia Lms Samoa 1830-1962." *Malua Journal*, no. 1 (2019).
- Lovett, Richard. *The History of the London Missionary Society 1795-1895*. Vol. 1, London: Oxford University Press, 1899.
- Meleisea, Malama. *Lagaga: A Short History of Western Samoa*. Suva, Fiji: Institute of the Pacific Studies and Western Samoa Extension Centre of the USP, 1987.
- "Memorandum of Confirmation ". Tuilaepa and others to Thomas Heath, 16th September, 1847.
- Moyle, Richard. *The Samoan Journals of John Williams, 1830 - 1832*. Canberra Australian University Press, 1984.
- Petaia, Ruperake. *O Le Inailau Na Au Ma Le Meaalofa O Le Kirisimasi*. Apia, Samoa: Malua Printing Press, 2008.

Sauoai, Lafai. *O Le Mavaega I Le Tai*. Apia, Samoa: Malua Printing Press, 1988.

Tupua, Na'oia Fereti. *O Le Suaga a Le Va'atele (the Findings of the Big Canoe)*. Tamaligi, Apia Samoa: Malua Printing Press, 2002.

Williams, Rev. John. *A Narrative of Missionary Enterprises in the South Sea Islands* London: John Snow, 1840.

Fa'atalatalanoaga

Finauapai, Petelo, Apai Manono, about the origin of Manono Island, 10th December 2018.

Finauapai, Tavita, Apai Manono, about the rock known as Tea in front of Apolima Island, 10th December 2018.

Taupau Afioae, Salua Manono, about the origin of the Star Mount on Manono Island, 12th January 2019.

Tuila'epa Fuava, Apai Manono, about the land donated for the church building, 12th January 2019.

Rev. Le'au Paniani Iona, Apai Manono CCCS, about the first church building, 12th January 2019.